

**KALIKATA LITTLE MAGAZINE LIBRARY-O-GABESHANA KENDRA**  
**18/M TAMER LANE, KOLKATA-700009**

Record No. : KLMLGK 2007/	Place of Publication : <i>ବିଏସ୍ ପବ୍ଲିଶିଂ ହାଉସ୍, କଲକତା</i>
Collection : KLMLGK	Publisher : <i>ସୁଧର ଶିକ୍ଷା</i>
Title : <i>ସବୁପତ୍ର (SabujPatra)</i>	Size : 7.5" x 6"
Vol. & Number : <div style="text-align: center;"> <i>6/1</i>  <i>6/2</i>  <i>6/3</i>  <i>6/4</i>  <i>6/5</i> </div>	Year of Publication : <div style="text-align: center;"> <i>ଜୁଲାଇ ୨୦୧୫</i>  <i>ଅଗଷ୍ଟ ୨୦୧୫</i>  <i>ସେପ୍ଟେମ୍ବର ୨୦୧୫</i>  <i>ଅକ୍ଟୋବର ୨୦୧୫</i>  <i>ନଭେମ୍ବର ୨୦୧୫</i> </div>
	Condition : <input checked="" type="checkbox"/> Brittle / <input type="checkbox"/> Good
Editor : <i>ସୁଧର ଶିକ୍ଷା</i>	Remarks :

C.D. Roll No. : KLMLGK
------------------------

# সবুজ পত্র



সম্পাদক

শ্রীপ্রমথ চৌধুরী

১৩২৬

বৈশাখ - আশ্বিন



বাধিক মূল্য—তিন টাকা ছয় আনা  
'সবুজ পত্র' কার্যালয়, ৩ নং হেটস্‌ স্ট্রিট,  
কলিকাতা

কলিকাতা,  
৩ নং হেলিক্স স্ট্রীট  
শ্রীপ্রমথ চৌধুরী এম. এ. দ্বারা-ম্পাদিত বা কর্তৃক  
প্রকাশিত।

কলিকাতা  
হাইকলী নোটস প্রিণ্টিং ওয়াহস,  
৩ নং হেলিক্স স্ট্রীট  
শ্রীসত্যনাথদাস দাস দ্বারা মুদ্রিত।

Jeshitish Chandra Sen

Jyotman Singh

## বর্ণানুক্রমিক সূচী।

(বৈশাখ—আশ্বিন)

১৩২৬

বিষয়।		পৃষ্ঠা।
১। অতীতের বোঝা	... ওয়ালেদ আলি	... ৮১
২। আমাদের শিক্ষা ও বর্তমান জীবন সমস্তা	... শ্রীপ্রমথ চৌধুরী	... ১৪২
৩। ইঙ্গ-স্বল্পপত্র ...	... বীরবল ...	... ২১৮
৪। উড়া চিঠি ...	... সুভদ্রায় ...	... ৪১
৫। উদ্ভাসদয়ন্তী জাতক	... শ্রীহরেশানন্দ ভট্টাচার্য্য অনূদিত	২২১
৬। উপকথা ( গল্প )	... শ্রীপ্রমথ চৌধুরী	... ৭৬
৭। একখানি পত্র	... শ্রীহরেশানন্দ ভট্টাচার্য্য অনূদিত	... ১৮২
৮। ওমর ষেরাম ...	... শ্রীপ্রমথ চৌধুরী	... ৬২
৯। কথিকা ( গল্প )	... শ্রীবীরেন্দ্রনাথ ঠাকুর	১৮০, ১৯৩, ২৫৭
১০। কবি	... শ্রীকান্তিচন্দ্র ঘোষ	... ২৮২
১১। খোলা চিঠি ...	... শ্রীপ্রমথ চৌধুরী	... ৭
১২। গান ( কবিতা )	... শ্রীবীরেন্দ্রনাথ ঠাকুর	... ১
১৩। ঝিলে জঙ্গলে শীকার	... শ্রীমতী প্রিয়ধর্মদেবী অনূদিত	১৩৫, ১৯৭, ৩৩৯
১৪। সুপু সুপু—চুপু! ( গল্প )	... শ্রীহরেশানন্দ ভট্টাচার্য্য	... ২২৭
১৫। হু-ইয়ারকি ...	... শ্রীপ্রমথ চৌধুরী	... ১১০
১৬। দৃষ্টি ( কবিতা )	... শ্রীহেমেন্দ্রলাল রায়	... ৩৩৮
১৭। নতুন রূপ কথা ( গল্প )	... শ্রীহরেশচন্দ্র চক্রবর্তী	... ৩০৯
১৮। নববর্ষ ...	... শ্রীপ্রমথ চৌধুরী	... ২২



১৯। নবীনের প্রতি ( কবিতা ) ...	শ্রীহরেশচন্দ্র চক্রবর্তী ...	৩০৮
২০। নেশার জের ( গল্প ) ...	শ্রীকান্তিচন্দ্র ঘোষ ...	২৭
২১। পত্র ...	শ্রীশিশিরকুমার সেন ...	২০৭
২২। প্রতিধ্বনি ( কবিতা ) ...	শ্রীশৈলেন্দ্রকৃষ্ণ লাহা ...	৩৮
২৩। প্রেম ( কবিতা ) ...	শ্রীকান্তিচন্দ্র ঘোষ ...	৩৯
২৪। বিজ্ঞাপন রহস্য ...	বিদ্যবল ...	২৩৬
২৫। বিরহাকাঙ্ক্ষা ( কবিতা ) ...	শ্রীকান্তিচন্দ্র ঘোষ ...	২৮৭
২৬। বিসর্জন ( গল্প ) ...	শ্রীবীরেশ্বর মজুমদার ...	৩৫৪
২৭। ভাইবোন ( গল্প ) ...	শ্রীপ্রবোধ ঘোষ ...	২৫৩
২৮। ভবভূতি ( কবিতা ) ...	শ্রীশৈলেন্দ্রকৃষ্ণ লাহা ...	৩৭
২৯। ভারতের নারী ...	শ্রীবীরেন্দ্রকুমার দত্ত ...	২৭১
৩০। মহাদেব ( কবিতা ) ...	শ্রীহরেশচন্দ্র চক্রবর্তী ...	৩০৬
৩১। মাহুঘ ও সমাজ ...	" " "	২৩২
৩২। মিলনাকাঙ্ক্ষা ( কবিতা ) ...	শ্রীকান্তিচন্দ্র ঘোষ ...	২৮৬
৩৩। মেঘের বাপ ( গল্প ) ...	শ্রীপ্রবোধ ঘোষ ...	২৮০
৩৪। মুক্তি ( গল্প ) ...	শ্রীকান্তিচন্দ্র ঘোষ ...	১৮৭
৩৫। মুক্তির ইতিহাস ( গল্প ) ...	শ্রীরবীন্দ্রনাথ ঠাকুর ...	৫৫
৩৬। রবীন্দ্রনাথের পত্র ...	* * *	২
৩৭। ৮নামের হৃদয় ত্রিবেদী ...	শ্রীঅতুলচন্দ্র গুপ্ত ...	৬০
৩৮। রূপ ( কবিতা ) ...	শ্রীহরেশানন্দ ভট্টাচার্য্য ...	৪০
৩৯। সং-চিন্তা-আনন্দ ( কবিতা ) ...	শ্রীমতী সরলা দেবী চৌধুরাণী ...	১৩৪
৪০। সম্পাদকের নিবেদন ...	শ্রীপ্রমথ চৌধুরী ...	১২
৪১। সাহিত্য চর্চা ...	শ্রীমতী ইন্দিরা দেবী চৌধুরাণী ...	১০৩
৪২। সোহাগ ( কবিতা ) ...	শ্রীকুমুদরঞ্জন মল্লিক ...	২৮৮

## গান।

—:—

আমার জীর্ণ পাতা যাবার বেলায় বারে বারে  
ডাক দিয়ে যায় নতুন পাতার দ্বারে দ্বারে ॥  
তাই ত আমার এই জীবনের বনছায়ে  
ফাগুন আসে ফিরে ফিরে দখিন বায়ে,  
নতুন স্বরে গান উড়ে যায় আকাশ পারে,  
নতুন রঙে ফুল ফুটে তাই ভারে ভারে ॥

ওগো আমার নিত্যানুতন, দাঁড়াও হেসে,  
চলব তোমার নিমন্ত্রণে নবীন বেশে ।  
দিনের শেষে নিবল যখন পথের আলো,  
সাগরতীরে যাত্রা আমার যেই ফুরালো,  
তোমার বাঁশি বাজে সাঁঝের অন্ধকারে,  
শূন্যে আমার উঠল তারা সারে সারে ॥

শ্রীরবীন্দ্রনাথ ঠাকুর।



## রবীন্দ্রনাথের পত্র ।

৬

শ্রীমান প্রমথনাথ চৌধুরী

কলাগীয়েবু

আমার শারীরিক অবসাদ এত বেশি হয়েছে যে, চিঠিপত্র লেখা প্রচুতি সংসারের ছোট ছোট ঋণগুলোও প্রতিদিন জমে উঠে— পরজন্মে এই পাপের যদি দণ্ড থাকে তাহলে নিশ্চয়ই আমি দৈনিক সংবাদপত্রের এডিটর হব। সে আশঙ্কার কথা মনে উদয় হলেই নির্ঝাঁপমুক্তির জন্তে উঠে পড়ে লাগতে ইচ্ছা হয়—কিন্তু তার চেয়ে সহজ চিঠির জবাব দেওয়া। সবুজপত্রকে বাঁচিয়ে রাখতে হবে বই কি। দেশের তরুণদের মনে সবুজ রংকে বেশ পাকা করে দেবার পূর্বে তোমার ত নিষ্কৃতি নেই—প্রবীনতার বর্ণহীন রসহীন চাকলাহীন পবিত্র মরুভূমির মাঝে মাঝে অশুভ একটা আঘাত এমন ওয়েসিস থাক। চাই থাকে সর্ববিষ্যাপী জ্যাঠামির মারী-হাওয়াতেও মেরে ফেলতে না পারে। অশুভহীন বালুকারণিশির মধ্যে তোমার নিত্যমুখর সবুজপত্রের দোদুল্যমান ছায়াটুকু যৌবনের চির-উৎস ধারার পাশে অক্ষয় হয়ে থাক। প্রাণের বৈচিত্র্য আপন বিজ্রোহের সবুজ জয়পতাকাটি শুভ একাকারহের বুকের মধ্যে গেড়ে দিয়ে অমর হয়ে দাঁড়াক। আমার এই খোলা জানালাটার কাছে বিশ্রাম শয্যায় শুয়ে আমি আমার

৬ষ্ঠ বর্ষ, প্রথম সংখ্যা

রবীন্দ্রনাথের পত্র

৩

এই সামনের মাঠের দিকে অনেকটা সময় কাটাই। ওখানে দেখতে পাই মাঠের সমস্ত ঘাস শুকিয়ে পাণ্ডুবর্ণ হয়ে গেছে, শান্ত-উপদেশে-ভরা অতি পুরাতন পুঁথির পাতার মত। অনেক দিন বৃষ্টি নেই রৌদ্রও প্রখর—তাতে শুকতা প্রবল হয়ে এক দিগন্ত থেকে আরেক দিগন্ত পর্যন্ত সমস্ত ভূমিকে অধিকার করেছে। তার প্রতাপ যে কত বড় তা এই দূরবিস্তৃত শূন্যতার একটানা বিস্তার দেখলেই বুঝতে পারা যায়। কিন্তু এরই মধ্যে একটিমাত্র ভালগাছ এতবড় সনাতন নিষ্কর্ষিতাকে উপেক্ষা করে একলাই দাঁড়িয়ে আকাশের সঙ্গে আলোকের সঙ্গে নিতাই আপনার পত্রব্যবহার চালাচ্ছে। কোথাও কিছুমাত্র বাণী নেই কিন্তু এই একটু খানি মাত্র জায়গায় বাণীর উৎস কিছুতেই আর বন্ধ হয় না। একটি দেবশিশু প্রকাণ্ড দৈত্যের মুখের সামনে দাঁড়িয়ে হাসিমুখে যদি ভুড়ি মারে তাহলে সে যেমন হয় এও তেমনি। যে অমর তার ত প্রকাণ্ড হবার দরকার করে না, যতাই আপনার আয়তনের প্রসার নিয়ে বড়াই করে। তোমাদের সবুজপত্র এই ভালগাছটিরই মত দিগন্তবিস্তৃত বার্ক্কোর সন্নদরবারের মাঝখানে একলা দাঁড়াক।

জরাসন্ধের দুর্গ ভয়ানক দুর্গ—সেখানে প্রকাণ্ড কারাগার, সেখানে লোহার শিকলের মালার আর অস্ত্র নেই। কিন্তু তার ভয়ঙ্কর কড়া পাহারার মধ্যেও পাণ্ডব এসে প্রবেশ করে, তার সৈন্য নেই সামন্ত নেই; সেই নিরস্ত্র-তারুণ্য কত সহজে কত অল্প সময়ে জরাসন্ধকে ভূমিসাৎ করে দিয়ে তার কারাগারের দ্বার ভেঙে দেয়; সেখানে বন্দী ক্ষত্রিয়দের মুক্তিদান করে। আমাদের দেশেও জরাসন্ধের দুর্গের মধ্যে দেশের ক্ষত্রিয়েরাই বন্দী রয়েছে,

যারা ক্ষত থেকে দেশকে ত্রাণ করবে, যারা দূরে দূরান্তরে আপন অধিকার বিস্তার করবে, যারা বিরাট প্রাণের ক্ষেত্রে দেশের জয়ধ্বজা বহন করে নিয়ে যাবে, আমাদের অহমেদের ঘোড়ার রক্ষক হবে তারা। সেই যুবক ক্ষত্রিয়দের হাত পা থেকে জরার লোহার বেড়ি ঘুচিয়ে দেবার ত্রুত নিয়েচ তোমরা; তোমাদের সংখ্যা বেশি নয়, তোমাদের সমাদর কেউ করবে না, তোমাদের গাল দেবে, কিন্তু জয়ী হবে তোমরাই—জরার জয়, মৃত্যুর জয় কখনই হবে না।

তোমাদের সবুজপত্রের দরবারে আমাকে তোমরা আমন্ত্রণ করেচ। তোমাদের সাধনা যখন সবুজ পত্রের নাম নিয়ে আপনাকে প্রকাশ করে নি তখনো এই সাধনা আমি গ্রহণ করেছি, বহন করেছি। তারূণ্য নূতন নূতন কালে, নূতন নূতন রূপে, নূতন নূতন পুষ্প-পল্লবে নিজেকে বারবার প্রকাশ করে। প্রাণের অক্ষয় বট যে অক্ষয় তার কারণ তার মজ্জার মধ্যে চিরতারাণ্যের রসধারা বইচে। তাই প্রতি বসন্তেই সে বারেরবারে নূতন বেশে নবযুবক হয়ে দেখা দেয়। আমাদের দেশেও জীর্ণ বটের মজ্জার মধ্যে যদি যৌবনের রস একে-বারেই না থাকত তাহলে এর ঘারাই দেশের চিতাকার্ত্তই রচনা হত। কিন্তু এখানেও দেখি, মাঝে মাঝে যৌবন একটা আকস্মিক বিদ্রোহের মত কোথা হতে আবির্ভূত হয়ে কঠিন জরার প্রতি অশ্রদ্ধা প্রকাশ করে। আমাদের সময়েও সে নির্ভয়ে এসেছে, নূতন কথা বলেচে, মার খেয়েছে, পুরাতন আপন চণ্ডীমণ্ডপে বসে তাকে একঘরে করে দিয়েচে। সে দিন আমি সেই ঝোড়ো দলের মধ্যেই ছিলাম। দল যে বাহিরে খুব বড় ছিল তা নয়, কিন্তু অন্তরে তার বেগ ছিল। চণ্ডীমণ্ডপ নিবাসীরা এখনো সে জন্তে আমাকে ক্ষমা করে নি। আমি

তাদের ক্ষমার দাবীও করি নে, কেননা আমি জেনে শুনে ইচ্ছাপূর্বক চণ্ডীমণ্ডপের শাস্তি ভঙ্গ করেছি, সেখানকার বৈকালিক নিষ্কার যতদূর ব্যাঘাত করবার তা করতে ত্রুটি করি নি। অর্থাৎ বিকালের নিস্তরু তন্দ্রালোকে সকালের চাকল্য সমীর্ণিত করবার চেষ্টা করেচি।

আমাদের কালের সেই চাকল্য সাধনাই তোমাদের কালের নূতন পাতায় বিকশিত হয়ে নীলাকাশের উপুড়-পেয়লা থেকে সূর্যালোকের তেজোরস পান করবার চেষ্টা করেচ। সেই তেজ তোমাদের ফলে ফলে সঞ্চারিত ও সঞ্চিত হয়ে দেশের প্রাণ-ভাণ্ডারকে পুনঃ পুনঃ পূর্ণ করবে।

কিন্তু একটা কথা তোমরা ভুলে গেছ, ইতিমধ্যে আমার পদোন্নতি হয়েছে। ছিলেম যুবক মহারাজের দ্বারের প্রহরী এখন শিশু-মহারাজের সভায় সখার পদ পেয়েচি। অর্থাৎ নবজন্মের সীমানার কাছাকাছি এসে পৌঁচেছি—মৃত্যুর পূর্বে এই চৌকাঠটি পেরোনোই বাকি আছে। এই যে এগোবার দিকে চলেচি এখন আমাকে পিছু ডাক ডেকো না। বিধাতা আমাকে বর দিয়েচেন আমি বুড়ো হয়ে মরব না। সেই জন্তে যৌবন-মধ্যাহ্ন পেরিয়ে আমার আয়ু চিরশামল শিশু-দিগন্তের দিকে নেমেচে। আমার জীবনের শেষ কাজ এবং শেষ আনন্দ এখানেই রেখে যাবার জন্তে আমার ডাক পড়েচে। যৌবনের জয়যাত্রায় আমার জীবনের অধিকাংশ কালই আমি আঘাত অপমান নিন্দার কাছে হার মানি নি, আমি অশান্তির অভিঘাতের ভয়ে পিঠ ফিরিয়ে পালিয়ে যাই নি। কিন্তু এখন দিন শেষে আমার মনিবের হাত থেকে পুরস্কার নেবার সময় হয়েছে। আমার মনিব এসেচেন শিশু হয়ে, পুরস্কারও পাচ্চি। তাঁর কাজে শাস্তি অন্ন, শাস্তি যথেষ্ট,



কিন্তু ছুটি একটুও নেই। সেই জন্তে এখন থেকে আমি তোমাদের জয়কামনা করি, কিন্তু তোমাদের তালে তালে পা কেলে তোমাদের অভিযানে চলব এখন আমার আর সে অবকাশ নেই। আগামী কালে যারা যুবক হবে আমি এখন তাদের সঙ্গ নিয়েছি। তাদের সেই ভাবী যৌবন নিশ্চল হবে, নির্ভয় হবে, জড়তা, স্বার্থ বা জনাদরের শ্রবলতা বা শ্রলোভনে অভিভূত না হয়ে সত্যের জন্ত আপনাকে উৎসর্গ করবে এই যে আমি কামনা করেছি সেই কামনা যদি আমার কিছু পরিমাণেও সিদ্ধ হয় তাহলেই আমার জীবন চরিতার্থ হবে। ইতি ১৭ বৈশাখ ১৩২৬।

শ্রীরবীন্দ্রনাথ ঠাকুর।

## খোলা চিঠি।

শ্রীযুক্ত রবীন্দ্রনাথ ঠাকুর

শ্রীচরণেশ্বর।

আপনার চিঠি ঠিক সেই সময়ে আমার হাতে এসেছে, যখন আমার অবসন্ন মনকে চাগিয়ে তোলবার জন্ত, আপনার মুখের উৎসাহের বাণী আমার মনের পক্ষে একান্ত প্রয়োজন ছিল।

আপনি সম্ভবত লক্ষ্য করেছেন যে, আমি কিছুদিন থেকে আমার লেখার হাত ক্রমে গুটিয়ে নিচ্ছি। লেখবার প্রবৃত্তি সকলের পক্ষে অদম্য ত নয়ই—স্বাভাবিক নয়। অতএব অবলীলাক্রমে লেখা সকলের সাধ্য নয়। আমাদের মত লেখকদের পক্ষে যা স্বাভাবিক সে হচ্ছে লেখবার অপ্ৰবৃত্তি, এবং এই আশ্চর্যিক অপ্ৰবৃত্তির সঙ্গে যোঝাযুঝি করে' তার উপর জয়ী হওয়া যে কত কঠিন, কত আয়াসসাধ্য, তা লেখকমাত্রেই অন্তর্ধর্মী জানেন। তার উপর দুঃখের বিষয় এই যে, আর পাঁচ রকম হাতের কাজের মত, লেখার অভ্যাসটা কালক্রমে দ্বিতীয় স্বভাব হয়ে দাঁড়ায় না। একবার হাত তৈরি হয়ে গেলে, বাজনা লোকে অশ্রমক হয়েও বাজাতে পারে, কিন্তু লেখা, মন না দিয়ে, শুধু হাত দিয়ে কেউই লিখতে পারে না, সম্ভবত এক সংবাদ পত্রের সম্পাদক ছাড়া।

আমি আজ-পাঁচ বৎসর ধরে, আমার প্রকৃতির এই ধাতুগত অপ্রতিরূপিত সঙ্গ্রে ক্রমাগত লড়াই করে আসছি, দলে আমার অন্তরাঙ্গী বর্ধমান, একসঙ্গে শ্রাস্ত, ক্রাস্ত, বিষণ্ণ ও অবসন্ন হয়ে পড়েছে। আমার দেহ ও মন, তাদের বিশ্রামের হাল-বকেয়া সমস্ত পাওনা, একযোগে হ্রদহ্রদ আদায় করে নেবার চেষ্টায় আছে। আলস্য যখন দেহকে এবং অবসাদ যখন মনকে একসঙ্গে পেয়ে বসে, তখন লেখক-মাত্রেরই পক্ষে, অস্তুত কিছুদিনের জন্ত সাহিত্যের কারখানা থেকে ছুটি নেওয়া দরকার। তাতে শুধু লেখকের নয়, সাহিত্যেরও উপকার হয়। কেননা মনের এ অবস্থায় আমাদের সকল লেখাপড়া একান্ত নিরর্থক, আছোপাশ্রুত রাখা বলে মনে হয়।

“Of making many books there is no end and much study is a weariness to the flesh”—বাইবেলের সেই অতি পুরোনো কথা এ বিষয়ের শেষকথা বলে বিশ্বাস করতে সহজেই ইচ্ছা যায়।

আপনার চিঠি যখন আমার কাছে এসে পৌঁছয়, তখন আমি মনে মনে Vanity of vanities all is vanity—এই মন্ত্র জপ করছিলাম; কেননা এ মন্ত্র মনের সনাতন ঔষধ, সদয়ের সকল ক্ষতের অব্যর্থ মলম। এ সংসারে আমাদের কাছে বা সব চেয়ে প্রত্যক্ষ, সে হচ্ছে মানুষের লাঞ্ছনা—একদিকে প্রকৃতির হাতে, আর একদিকে মানুষের হাতে। মানুষ যেমন অশেষ দুঃখ নিজে পায়, তেমনি অশেষ দুঃখ পরকে দেয়। মানুষের এই দুঃখ আর এই পাপকেই যদি সার সত্য বলে স্বীকার করতে হয়, তাহলে ভেবে দেখুন ত, মনের অবস্থা কতটা আরাগমের হয়ে ওঠে। এ অবস্থায় “জীবন মিথ্যা

আর মৃত্যুই সত্য”—এই বিশ্বাস মানুষের মনে অপূর্ণ সাহুনা এনে দেয়। জীবনের বিরাট ট্রাজেডিকে farce স্বরূপে দেখতে শিখলেই, আমরা যথার্থ মায়ামুক্ত হই। তবে মুকিল এই যে, এ সব কথা যত সহজে মুখে আনা যায়, তত সহজে মনে বসানো যায় না। ছুনিয়াকে কীকি বলে, আমরা কেউ আর নিজের দুঃখকে কীকি দিতে পারি নে।

সে যাই হোক, একথা নিশ্চিত যে, এ রকম পীড়িত মনোভাব যে-কথার পিছনে আছে, সে কথা নিছক নৈরাশ্বের উক্তি হতে বাধ্য; সুতরাং সে কথার মূল্য বিকারের প্রলাপের চাইতে বড় বেশি নয়। তা ছাড়া মনের কৃষ্ণপক্ষ অপরকে দেখাবার মত বস্তুও নয়। নিজের মনের মেঘের ছায়া সমাজের মনের উপর ফেলবার কোনও সার্থকতাও নেই; বিশেষত এদেশে। এমনিই আমরা কর্তৃসম্বন্ধে জ্ঞানসম্বন্ধে যথেষ্ট নিষ্কণ্টম যথেষ্ট নিশ্চেষ্ট। জীবনের উপর আমাদের শ্রদ্ধা নেই, শ্রদ্ধা ত দুরের কথা বিশ্বাস পর্যাস্ত নেই, এবং তার কারণ আমাদের নিজের উপর নিজের ভক্তি নেই, আস্থা নেই। সুতরাং আমাদের জাতীয় মনের মজ্জাগত অবসাদকে প্রশ্রয় দেবার অধিকার আমাদের কারও নেই। “ততঃ কিম্” ভর্তৃহরির এই প্রশ্ন সেই জাতিই করতে পারে, যে জাতি জীবনের সকল ক্ষেত্রেই নিজের কৃতিত্বের বলে জয়যুক্ত হয়েছে। এ প্রশ্ন আজকের দিনে জিজ্ঞাসা না করা ইউরোপের পক্ষে যেমন ছেলেমি, জিজ্ঞাসা করা আমাদের পক্ষে তেমনি আঠামি। মানসিক রক্তহীনতাকে আমি কখনই আধ্যাত্মিকতা বলে ভুল করিনি। আধ্যাত্মিকতা অর্থে আমি বুঝি আমাদের জীবাত্মাকে, আমাদের জ্ঞানের বলে কর্ণের বলে ভক্তির বলে শতদলে ফুটিয়ে তোলা, বুজিয়ে দেওয়া নয়; আমাদের প্রচ্ছন্ন আত্মশক্তিকে ব্যস্ত করে



তোলা, চেষ্টা দেওয়া নয়। আত্মশক্তিকে অস্বীকার করাই ত মানুষের সকল দুর্গতির মূল। ভগবান মানুষকে একমাত্র ঐ শক্তিই দান করেছেন, ভগবানের দানকে অগ্রাহ করে, কেউ আর মানুষ হতে পারে না। অতএব তঁদাস্ত্রের ও নৈরাশ্রের বাণী প্রচার করতে আমি কখনই ব্রতী হব না। “Vanity of vanities all is vanity” এ কথা বিক্রম্বে আমাদের সকল মনপ্রাণ নিত্য প্রতিবাদ করে।

আর এক কথা। আমার বিশ্বাস দেশের লোককে আশার কথা, আনন্দের কথা শোনানই এ যুগের লেখকদের পক্ষে কর্তব্য, নৈরাশ্রের কথা, তঁদাস্ত্রের কথা নয়। আনন্দই হচ্ছে একমাত্র প্রকাশ করবার, দশদিক ছাড়িয়ে দেবার, দেশের মনে চারিয়ে দেবার বস্তু; অপর পক্ষে বেদনা দেশের মন থেকে ছাড়িয়ে, দশদিক থেকে কুড়িয়ে নিজের অন্তরে সঞ্চিত ও ঘনীভূত করাই সকলের পক্ষে না হোক, অন্তত লেখকদের পক্ষে কর্তব্য; কেননা যে পরের ব্যথার ব্যথী নয়, সে পরকে কখন আনন্দ দিতে পারে না। নব্য-আলঙ্কারিকদের আদি-গুরু আনন্দবর্দ্ধনাচার্য্য বলে গিয়েছেন যে, ক্রৌঞ্চমিথুন বধে বাণীকির মনের শোক যদি তাঁর মুখে শ্লোকের আকার ধারণ না করত, অর্থাৎ স্তম্ভি যদি নিজের অন্তরের বেদনা পরের আনন্দের সামগ্রী করে জ্বলতে না পারতেন, তাহলে তিনি মানব-সমাজে শাশ্বতী সমা প্রতিষ্ঠা লাভ করতে পারতেন না।

এর থেকে ধরে নিছি মানুষের দুঃখ দূর করবার শক্তি যখন আমাদের নেই, তখন নিজের অন্তরের বেদনা, অপরের আনন্দের সামগ্রী করে তোলাই সকলের জীবনের ব্রত হওয়া উচিত। কে বলতে পারে যে, কবির সৃষ্টি প্রকৃতির সৃষ্টির চাইতে কম সত্য। এ

ব্রত কিন্তু এদেশে উদ্ব্যাপন করবার ক্ষমতা একমাত্র আপনাই আছে। স্তত্রাং আশা করি আপনার মুখ থেকে আমরা নিত্য নব আনন্দের বাণী শুনতে পাব।

আমরা চেষ্টাচরিত্রির করে বড়জোর আশার বাণী প্রচার করতে পারি, তার বেশি কিছু করতে পারি নে, কেননা আনন্দ সৃষ্টি করবার শক্তি ভগবান আমাদের দেন নি।—ইতি

শ্রী প্রমথ চৌধুরী।

২০ বৈশাখ, ১৩২৬

## সম্পাদকের নিবেদন ।

ছেলেবেলায় গল্প শুনেছি যে, জনৈক অতি কোঁতুহলী এবং সেই সঙ্গে অতি কৌশলী লোক কোন এক রোগের সুযোগে মিছে স্বপ্নে নিজের মৃত্যু সংবাদ রটিয়ে দেন; তাঁর মৃত্যুতে আত্মীয় স্বজন বন্ধু বান্ধবের মধ্যে “কে কাঁদে আর কে বলে থাকবে,” বেঁচে থাকতেই সেটা জেনে যাবার জন্ম ।

দেশময় যখন “সবুজ পত্রের” মৃত্যু সংবাদ ছড়িয়ে গিয়েছে তখন ও পত্রের আবার সফাৎ পেলে, লোকের মনে সহজেই এ সন্দেহ হতে পারে যে আমি ঐরূপ কোনও মতলবে উল্লরূপ কৌশল অবলম্বন করেছি ।

“সবুজ পত্র” বন্ধ করবার প্রস্তাবের ভিতর অবশ্য কোনরূপ চাপা উদ্দেশ্য ছিল না । আমি একজন সাহিত্যিক-পলিটিসিয়ান নই; সুতরাং আমার কথার ভিতর কোনরূপ গুঢ় মতলব থাকবার কথা নয়, কেন না তা থাকলে সে কথা সাহিত্য হয় না । আর আমি পারি না পারি সাহিত্যই রচনা করতে চেষ্টা করি । তবে সত্যের খাতিরে আমাকে স্বীকার করতে হচ্ছে যে “সবুজ পত্রের” মৃত্যুর জনরবের প্রসাদে ও-পত্র সম্বন্ধে লোকমতের কিঞ্চিৎ আভাস পেয়েছি । উপরোক্ত মতলবী ব্যক্তি তাঁর চতুরতার ফলে কি জ্ঞান লাভ করেছিলেন, সে বিষয়ে ইতিহাস নীরব । সম্ভবত সে জ্ঞান তাঁর তেমন মুখরোচক হয় নি । এ

সত্য সকলে না জানলেও সকলের জানা উচিত যে আসলে জুল ধারণার উপরেই সকলে সুখে জীবন ধারণ করে । সে যাইহোক “সবুজ-পত্রের” মৃত্যুসংবাদে বাঙলার একদল লোক দুঃখ প্রকাশ করেছেন, এতেই আমি কৃতার্থ হয়েছি, বিশেষত যখন “ও বালাই গেছে বাঁচা গেছে” এমন কথা কোনও দৈনিক সাপ্তাহিক, কিম্বা মাসিক পত্রে অজ্ঞাবধি আমার দৃষ্টিগোচর হয় নি । “সবুজ পত্রের” মতামতে বাঁচা সায় দিতে পারেন না, দেখতে পাচ্ছি; তাঁরাও এ কথা স্বীকার করতে মোটেই কুণ্ঠিত নন যে, ও-পত্রের একটা নিজস্ব চেহারা আছে, এবং সেই সঙ্গে তাঁর প্রাণও আছে । কেন না যার প্রাণ নেই অর্থাৎ যা মৃত, তাঁর আর অকাল মৃত্যু কি করে ঘটতে পারে ।

( ২ )

যখন দেশের অন্তত জনকতক লেখকও চান যে “সবুজপত্র” বেঁচে থাকে চিরজীবী হয়ে, তখন যতদিন পারি ও-পত্রকে বাঁচিয়ে রাখবার ইচ্ছা হওয়াটা আমার পক্ষে নিতান্তই স্বাভাবিক । এই প্রবৃত্তি যে আতঃপর সংকল্পে পরিণত করতে বাধ্য হয়েছি, তাঁর কারণ অনেকের মতে আপাতত ও-পত্রের প্রাণরক্ষা করা আমার পক্ষে কর্তব্যও বটে ।

কেন কর্তব্য সে কথাটা একটা উদাহরণের সাহায্যে পরিষ্কার করবার চেষ্টা করা যাক । প্রায় পঞ্চাশ বৎসর পূর্বের বিজয়ী জর্মান সেনা যখন প্যারিস নগরীকে ঘিরে বসেন, তখন প্যারিসের আধাবল্বন্ধ



বনিভা সকলে একবাক্যে বলে উঠেছিল, “il faut etre là”— অর্থাৎ “এখানে আমাদের থাকা চাই”। অথচ কেন যে থাকা চাই, সে কথা জিজ্ঞাসা করলে শতকরা নিরনব্বই জন তার কোনও উত্তর দিতে পারত না। কেননা তাদের দ্বারা প্যারিস রক্ষার কোনরূপ সাহায্য হবার কোনই সম্ভাবনা ছিল না। অথচ এক প্রাণীও প্যারিস ত্যাগ করলে না, এমন কি অতি নিরীহ স্থূলকায় মুদি-পেশারীরাও নয়। কারণ এ বিষয়ে প্যারিসের কোনও নাগরিকের মনে বিন্দুমাত্রও সন্দেহ ছিল না যে, “il faut etre là”—নাগরিকদের পক্ষে স্বেচ্ছায় প্যারিসে অবরুদ্ধ হয়ে থাকাটা ফলের দিক থেকে দেখলে একটা মস্ত অকাজ কিন্তু আত্মার দিক থেকে দেখলে যে একটা বড় কাজ, সে কথা অস্বীকার করা চলে না। যখন একটা বড় গোছের দায় জাতির ঘাড়ে এসে পড়ে তখন নিজ নিজ শক্তি অনুসারে তার ভারবহন করবার অধিকার যে সকলেরই আছে, এই মন্ত্র সত্যের সন্ধান প্যারিসিয়ান মাত্রেই নিজ অন্তরে লাভ করেছিল, এর প্রমাণের জন্ম তারা কোনও যুক্তিতর্কের অপেক্ষা রাখে নি।

আজকের দিনেও আমরাও একটা যুগসন্ধির মধ্যে এসে দাঁড়িয়েছি, স্তবরাং বঁাদের স্বদেশের প্রতি স্বজাতির প্রতি মমতা আছে, তাঁদের প্রতিজ্ঞনের পক্ষেই যে যেখানে আছেন, তাঁর পক্ষে সেইখানেই দাঁড়িয়ে থাকা কর্তব্য, কেননা নানারকম ভীষণ সমস্যা আমাদের চারদিক থেকে একেবারে ঘিরে ফেলেছে। সংক্ষেপে “il faut etre là” যদিচ আমরা ঠিক জানিনে যে এইরূপ দাঁড়িয়ে থাকবার কোনও সার্থকতা আছে, কি নেই।

( ৩ )

বর্তমান ভারতে যে সমস্যাটা সব চাইতে প্রত্যক্ষ, সে হচ্ছে আমাদের পলিটিকাল সমস্যা। পলিটিকাল হিসাবে আমরা পৃথিবীর মধ্যে একটি সম্পূর্ণ নগণ্য জাত, এ হীনতা আমরা কেউ প্রসন্ন মনে গ্রাহ্য করে নিতে পারি নি। ফলে এই অসন্তোষ দিনের পর দিন মাসের পর মাস বছরের পর বছর শুধু বৃদ্ধি ও প্রসার লাভ করে এসেছে। তার পর এই যুদ্ধের ফলে পূর্বের যা ছিল অসন্তোষ তা এখন দাঁড়িয়েছে অশান্তিতে। এ অশান্তির ভোগ পৃথিবীর সকল দেশের রাজা প্রজাকে কিছুদিন ধরে কিছু না কিছু ভুগতেই হবে, তার জন্ম কোন পক্ষেইই হা হতাশ করবার প্রয়োজন নেই। এ অশান্তির মূলে আছে বিশ্বমানবের সেই মুক্তির আশা, সেই মুক্তির আকাঙ্ক্ষা, সেই মুক্তির প্রয়াস, এক কথায় মানুষের সেই আত্মজ্ঞান, যা এই যুদ্ধের জোড়ে বৃদ্ধিলাভ করেছে। মানুষ তার মনশুদ্ধে আজ যে সভ্যতার সাফল্য পেয়েছে, কাল হোক পরশু হোক মানব সমাজে সে সভ্যতার প্রতিষ্ঠা হবেই হবে, কেউ তা চিরদিনের জন্ম ঠেকিয়ে রাখতে পারবে না। হতে পারে যে আমার এ বিশ্বাস ভুল। তাতে কিছু আসে যায় না, কেননা ভুল ধারণার উপরেই সকলে যে জীবন ধারণ করে, আমরা এ মত ত আগে থাকতেই জানিয়ে রেখেছি।

এই নব আশায় আমাদের বুক বাঁধতে হবে, এবং এই নব-সভ্যতা গড়বার দায়িত্ব আর পাঁচজনের মত আমাদেরও ঘাড় পেতে নিতে হবে; এই কথাটা স্মরণ রেখো যে, এই মুক্তির পথে অশেষ বাধা, অসংখ্য বিপন্ন আছে। কোন বিষয়ে বাধা পেলে হতাশ হয়ে পড়াটা



আমাদের জাতিগত স্বভাব, আমরা যদি সত্য সত্যই জীবনের সকল ক্ষেত্রেই নিজের পায়ে ভর দিয়ে দাঁড়াতে চাই, তাহলে আমাদের চিরাগত স্বভাবকে পদে পদে অতিক্রম করবার জ্ঞান প্রস্তুত হতে হবে।

এ সত্য আমরা ভুলে গেলে চলবে না যে, মানুষ কোনও কাম্যবস্তু একমাত্র কামনার বলে লাভ করতে পারে না, যদি না তার পিছনে সাধনার বল থাকে,—আর সাধনার অর্থ হচ্ছে বাধা অতিক্রম করবার ইচ্ছা ও জ্ঞান শিক্ষা ও শক্তি। সিঙ্গিলাভের পক্ষে মানুষের বিবিধ বাধা আছে, এক বাইরের আর ভিতরের। এই বাইরের বাধা গুলিই বেশি করে আমাদের চোখে পড়ে, কেননা চর্খচক্ষুর সম্পর্কই হচ্ছে বহির্জগতের সঙ্গে। অথচ এ কথা সম্পূর্ণ সত্য যে নিজের ভিতরকার বাধাই হচ্ছে মানুষের সব চাইতে বড় বাধা, এবং এই বাধা অতিক্রম করতে না পারলে মুক্তিলাভ করতে কেউ পারে না, কোন ব্যক্তিও নয় কোন জাতিও নয়। আমাদের নিজের প্রকৃতিই যে আসলে আমাদের দীন করে রাখে, এ সত্য সকলের নিকট প্রত্যক্ষ নয়, তারপর বাঁর কাছে প্রত্যক্ষ তাঁর কাছেও সে সত্য প্রিয় নয়। নিজের প্রকৃতির উপর জয়লাভ করা অত্যন্ত কঠিন, এ যুদ্ধে হৃদয়বাহের সাহায্য পাওয়া যায় না, অপর পক্ষে বাহিরের বাধা দূর করতে যখন আমরা অগ্রসর হই, তখন রোষ ও ক্ষোভ আবেগ ও আক্রোশ প্রভৃতি মনোবৃত্তি আমাদের প্রবল সহায় হয়। এদের সহায়তায় অবশ্য আমরা সব সময়ে সিঙ্গির পথে অগ্রসর হতে পারি নে। এ জাতীয় মনোবৃত্তি মানুষকে উত্তেজিত করে কিন্তু তার পথ নির্দেশ করতে পারে না, এরা যে জন্মাদ্ধ। স্মরণ্য আমাদের

যদি জীবনে মুক্তপুরুষ হতে চাই তাহলে আমাদের মনকে মুক্ত করতে হবে, জ্ঞানকে আয়ত্ত্ব করতে হবে। যে জাতি-গঠনের কথাই দেশ আজ মুখরিত, তার গোড়ার কথা এবং শেষ কথাও হচ্ছে স্বজাতীর মন গড়ে তোলা।

( ৪ )

বাইরের অবস্থার যে বদল দরকার এ কথা আমি অস্বীকার করি নে, কেননা আমি বাহ্যজ্ঞান শূন্য নই। প্রতিকূল অবস্থার ভিতর মানুষ হয়ে ওঠা যে কতদূর কঠিন সে বিষয়ে আমি সম্পূর্ণ সচেতন। ম্যালেরিয়ার ভিতর বাস করে' অনশনক্রিষ্ট লোকে কেবল মনের জোরে যে স্বস্থ ও সবল হয়ে উঠতে পারে, মনের এতাদৃশ অলৌকিক শক্তির উপর আমার কোন প্রকার ভরসা নেই। বাইরের অবস্থা যত অনুকূল হবে, দেহ ও মনে আমরা মানুষ হয়ে ওঠবার যে তত সুযোগ পাব, এ ত প্রত্যক্ষ সত্য। স্মরণ্য বাঁরা রাজনীতির ক্ষেত্রে শিল্প-বাণিজ্যের ব্যাপারে আমাদের ছরবস্থা দূর করবার জ্ঞান ব্রতী হয়েছেন, তাঁরা যে দেশের মহা উপকার সাধন করছেন সে বিষয়ে সন্দেহ নেই। আমার শুধু বক্তব্য এই যে, কেবল মাত্র কল কারখানার সাহায্যে আমরা ষাথার্থ মুক্তিলাভ করতে পারব না; কল তা—সে বসনেরই হোক আর শাসনেরই হোক, মানুষ গড়তে পারে না, কেননা ঘটনা এই যে মানুষেই কল গড়ে। বাহিরের অবস্থা যতই অনুকূল হোক না কেন, সে অবস্থা মানুষকে তার মনুগ্ৰহ লাভের



স্বযোগ দেয় মাত্র, তার বেশি কিছু করতে পারে না। সে স্বযোগের সদ্ব্যবহার করা আর না করা, করতে পারা আর না পারা, নির্ভর করে তার মন আর চরিত্রের প্রবৃত্তি ও শক্তির উপর।

মানুষের মন যে তার দেহের চাইতে বড়, তার আত্মশক্তিই যে সব চাইতে বড় শক্তি, এ কথা যদি সত্য হয়, তাহলে স্বীকার করতেই হবে যে আমাদের মথার্থ কাম্যবস্তু হচ্ছে মনের স্বরাজ্য, এবং এই স্বরাজ্য লাভের প্রধান সহায় হচ্ছে সাহিত্য। বাঙালীর মন-বাঙলা ভাষার ভিতর দিয়ে বাঙলা সাহিত্যের সঙ্গে সঙ্গে গড়ে উঠবে, এই বিশ্বাস এই আশাই হচ্ছে “সবুজ পত্র”র আন্তরিক কথা। এ কথা শুনে অনেকে বলতে পারেন—“সবুজ-পত্র”ত কিছুই গড়ে না, শুধু অনেক জিনিষ ভাঙ্গে। এর উত্তর যে মনের দেশেও কারাগারের দেয়াল ভাঙ্গার নামই গড়া।

( ৫ )

পৃথিবীতে এমন লোক অনেক আছে, যারা যে কাজ করতে পারে তাকে ছোঁয় না, আর যে কাজ করতে পারে না তাতেই গিয়ে হাত লাগায়। এইরূপ অনধিকার চর্চার ফলে মানুষের চের চেফ্টা বিফল হয়, চের কাজ বিগড়ে যায়। আশা করি এ রকম ভুল আমরা করে বসব না। ভারতবর্ষকে এ যুগে বাঙালী যা দিতে পারবে, এবং বিশেষ করে বাঙলাই তা দিতে পারবে,—সে হচ্ছে তার হাতের কাজ নয় মনের কাজ। স্বদেশকে আমাদের প্রধান দানই হবে সাহিত্যদান। এ দান যে কি আকার ধারণ করবে তার পরিচয় নেওয়া এবং সেই

সঙ্গে তার মূল্য নির্ধারণ করাটাও আমাদের পক্ষে নিতান্ত আবশ্যিক, নচেৎ পরের কথায় আমরা স্বধর্ম ত্যাগ করতে উজত হতে পারি, এবং তাতে আমাদের যথেষ্ট ক্ষতি ত হবেই এবং ভারতবর্ষের কোনও লাভ হবে না। বৈষ্ণবকূল ত্যাগ করলেই যে তীতিকূল লাভ করা যায় না, এ সত্য এদেশে ইতর সাধারণেও জানে। যারা সাহিত্য চর্চা করেন তাঁদের চিরদিনই কাজের লোকদের কাছ থেকে নানারূপ বাজে কথা শোনবার জগ প্রস্তুত থাকা প্রয়োজন। এ সব কথায় অবশ্য কর্ণপাত করতে হবে কিন্তু মনোযোগ দেবার প্রয়োজন নেই।

( ৬ )

আমরা সকলেই এখন দেশের পূজায় রত হয়েছি। এ পূজায় কেউ বা দান করবেন বস্ত্র, কেউ বা অন্ন, কেউ বা সুবর্ণ কিন্তু আমরা দান করতে পারব শুধু ধূপ দীপ আর পুষ্প। এই তিন দানের মূল্য যে কি সে বিষয়ে, একটি প্রাচীন ইতিহাস এখানে কীর্ত্তন করি। পুরাকালে এই ভারতবর্ষে সুবর্ণ নামক জনৈক ঋষি সায়ভুব মনুকে প্রশ্ন করেন যে ধূপ দীপ পুষ্পের দ্বারা পূজা করবার সাধকতা কি। ভগবান মনু পুষ্পদানের এইরূপ গুণকীর্ত্তন করেন—

\* \* \* “দেবগণ কুহুমগন্ধ দ্বারা তুষ্ট হন, হৃৎ ও রাক্ষসগণ কুহুম দর্শনে সন্তুষ্ট হন, নাগগণ সম্যকরূপে পুষ্প উপভোগ করিলে তুষ্ট লাভ করে, আর মানবগণ আত্মদর্শন ও উপভোগ এই ত্রিবিধ উপায় দ্বারা সন্তুষ্ট হইয়া থাকে।”

সায়ভুব মনুর এ কথা যে সম্পূর্ণ সত্য, রবীন্দ্রনাথ এ যুগে তা অক্ষরে অক্ষরে প্রমাণ করে দিয়েছেন। তিনি ভারতীর পায়ে যে

পুষ্পাঞ্জলি দিয়েছেন, তার আশ্রাণে ও দর্শনে বিশ্বের লোক মোহিত হয়ে গিয়েছে এবং তা উপভোগ করবার জন্ম দেব দানব যক্ষ রক্ষ সকলেই লালায়িত হয়ে উঠেছে। মনু আরও বলেন যে—

“কুম্ভমগ্ন দেবগণকে তৎক্ষণাৎ প্রমত্ত করে; তাঁহারা সংকল্প দিচ্ছ অতএব ক্রীত হইয়া মানবগণের মনোরথ ইচ্ছিত হারা পরিবর্জিত করেন” \* \* \*

এ অবশ্য মস্ত আশার কথা, তবে তা এমুগে কতদূর ফলবে, সে ভবিষ্যতে দেখা যাবে।

এ দান করবার সাধ্য অবশ্য আমাদের নেই, কেন না প্রতিভার স্পর্শ ব্যতীত কোন ভাষাতেই কাব্যের ফুল ফুটে ওঠে না। তারপর আসে ধূপদানের মাহাত্ম্যের কথা, এ ক্ষেত্রে সে বিষয়ে মনুর বচন উদ্ধৃত করা নিস্প্রয়োজন। ধূপদান করাও আমাদের ক্ষমতার বহির্ভূত, আমরা বড়জোর কালেভদ্রে পুনো দিতে পারি, কিন্তু সে শুধু মশা তাড়াবার জন্ম।

এখন দীপদানের স্তফল শুভুন—

“দীপজ্যোতি উর্ধ্বগ ও অন্ধকার বিনাশক। এই নিমিত্ত উর্ধ্বগতি দান করে, এ বিষয়ে এই নিশ্চয় আছে। দীপদান হেতু দেবগণ তেজস্বী প্রভাসম্পন্ন ও প্রকাশমান হইয়াছেন, এবং দীপদান না করিয়া রাক্ষসগণ তামসভাবে লাজ করিয়াছে, অতএব দীপদান করা বিধেয় হইয়াছে। মানব আলোকদান হেতু চক্ষুস্থান ও প্রভায়ুক্ত হয়, অতএব দীপদান করিয়া হিংসা করিবে না, এবং তাহা হরণ করিবে না ও নষ্ট করিবে না” \* \* \*

আমরা “সবুজ পত্রের” অন্তরে মনের প্রদীপ জ্বালিয়ে রাখতে চেষ্টা করব এবং স্বদেশকে যদি কিঞ্চিৎ-মাত্র আলোকদানে সমর্থ হই, তাহলেই আমরা কৃতার্থ হব, কারণ আমরা চাই যে সকলে চক্ষুস্থান ও

প্রভায়ুক্ত হন। যাঁরা আলোকে ভাল বাসেন না তাঁদের নিকট আমাদের এইমাত্র প্রার্থনা যে, আমরা যে দীপদান করতে যত্নবান হয়েছি সে দীপকে, “হিংসা করিবে না, তাহা হরণ করিবে না ও নষ্ট করিবে না”। বলা বাহুল্য অন্ধকারেই মানুষ ভয় পায়।

পূর্বোক্ত ইতিহাস মহাভারতের অনুশাসন পর্বের সপ্তনবতিতম অধ্যায় হতে অনূদিত, কিন্তু এ অনুবাদ আমার কৃত নয় বর্ধমান রাজবাটীতে এর জন্ম; স্মৃতরাং এর ভাষার জন্ম আমি কিছুমাত্র দায়ী নই। ইতি

শ্রীপ্রমথ চৌধুরী।



## নব-বর্ষ।

—:—

শ্রীমান চিরকিশোর

কল্যাণীয়েষু—

নববর্ষ আর নববর্ষ, এদেশে এ দুই বস্তু এক কবিতা ছাড়া আর কোথাও মেলে না। আর আমাদের জীবনটা আর যাই হোক কবিতা নয়, যদি কিছু হয় ত সে এক মহা হ য ব র ল। তাই নতুন বছর প্রতি বৎসর আমাদের শুধু নতুন করে জ্বালাতে আসে, কিন্তু তাতে বেশি কিছু যায় আসে না। অভ্যাসের গুণে ও-জ্বালা আমাদের গা-সওয়া হয়ে গেছে। কিন্তু এবার বৈশাখ একেবারে অগ্নিশর্মা হয়ে দেখা দিয়েছেন। আকাশ এক সঙ্গে এমন লাল ও করাল হয়ে উঠেছে আর বাতাস এতটা উত্তপ্ত ও ক্ষিপ্ত হয়ে ছুটেছে যে, মনে হয় যেন কাছে-কোলে কোথাও আগুন লেগেছে। সকাল থেকে সন্ধ্যা উপর থেকে অবিরাম অগ্নিবৃষ্টি হচ্ছে, আর পশ্চিম থেকে একটানা একরোখা হাওয়া বইছে, যার স্পর্শে মুখ পুড়ে যায়, বুক পুড়ে যায়; আর দিনভর কানে আসছে তার হা হা হো হো শব্দ আর নাকে চুকছে তার চন্দনের নয়, গন্ধকের গন্ধ। এ আকাশ এ বাতাস আমাদের বাঙলা দেশের নয়, এমন কোনও পোড়া দেশের, যার উপর স্বপ্নের রোহ-কন্ধ্যায়িত নেত্রের দৃষ্টি পড়েছে।

সিন্ধুদেশে একটি সহর আছে যার তুল্য গরম জায়গা, খারমমেটরের মতে ভূ-ভারতে আর নেই, যতদূর মনে পড়ছে, সে সহরটির নাম হচ্ছে শকর। শুনতে পাই সে দেশের অধিবাসীরা বলে যে, ভগবান যখন শকর তৈরি করেছেন তখন নরক সৃষ্টি করবার আর কি প্রয়োজন ছিল। নরকের এক প্রদেশের দাস্তুর চোখে-দেখা বর্ণনাটি নিম্নে উদ্ধৃত করে দিচ্ছি, তার থেকে দেখতে পাবে যে, শকর বাসীদের এ প্রশ্ন মোটেই অসঙ্গত নয়।

“E già venia su per le torbid' onde  
un fracasso d' un suon pien di spavento,  
per cui tremavano ambedue le sponde.

non atrimenti fatto che d' un vento  
impetuoso per li avversi ardori,  
che fier la selva senza alcun rattento ;

li rami schianta, abbatte e porta fuori ;  
dinanzai polveroso va-superbo,  
e fa fuggir le fiere, e li pastori”

অসমার্থ—

“নদীর অপর-পার থেকে একলক্ষ তার খোলাজল ডিকিয়ে এমন একটি বিকট শব্দ আমাদের কানে এসে পৌছিল, যা শুনে আমাদের মন আতঙ্ক ভরে উঠল, আর যার ধাক্কা নদীর উভয়কূল থর থর করে কাঁপতে লাগল।

এ শব্দ সেই বাতাসের চীৎকারধ্বনি, যে বাতাস আগুনের তাড়নায় ছুটে পালিয়ে আসছে এবং হুয়ুবে গাছপালা যা-পড়ে তাকেই অবিরাম প্রহার করছে।



এই রুক্ষ-বায়ু গাছের সব ডালপালা ভেঙ্গে মাটির উপর ছড়িয়ে দিচ্ছে, আবার সে সব ঝেঁটয়ে নিয়ে যাচ্ছে। এ বাতাস হৃদয়ের মেঘ উড়িয়ে মহাদর্শে ভেঙে আসছে, আর কি পণ্ড কি মাহুষ সকলকেই মারের চোটে খেদিয়ে দিচ্ছে।”

এ বৎসর বৈশাখের রোমে আমরা দাস্তুর নরকের নবমচক্র যে পড়ে গিয়েছি সে বিষয়ে কোনই সন্দেহ নেই। জানো কি পাপে মানুষের এ নরক বাস হয়?—দাস্তুর বলেন সনাতন ধর্মে বিশ্বাস না করায়। আমরা যে এ অপরাধে অপরাধী সে জ্ঞান আমার ছিল না। তবে কথা হচ্ছে এই যে, পৃথিবীতে নানা রকমের orthodoxy আছে, সম্ভবত আমরা তার ভিতর কোন একটার প্রতি আস্থাহীন হয়ে পড়েছি। সেই পাপেই আমাদের এই শাস্তি।

আসলে সত্য কথা এই যে শুধু শরীর কেন, ভগবান যখন ভারতবর্ষ তৈরি করেছিলেন, তখন আর নরক তৈরি করবার কি প্রয়োজন ছিল? আশুন এদেশে চিরকালই জ্বলেছে—তাই না বৌদ্ধধর্মের সাধনার ধন হচ্ছে নিকরান, আর সনাতন ধর্মের কাম্য ও গম্যস্থান, স্বর্গ। আমাদের পূর্বপুরুষেরা স্বর্গে যাবার জন্ম তেমনি লালায়িত হতেন, যেমন আমরা হই, সিমলে দারজিলিং যাবার জন্মে এবং দুই-ই এক কারণে অর্থাৎ হাওয়া বদলাবার জন্মে। এর প্রমাণ তাঁদের সঞ্চিত পুণ্য ক্ষয় হলে তাঁরা স্বর্গ ছেড়ে আবার দেশে ফিরে আসতেন, যেমন আমাদের পুঁজি-পাটা খরচ হয়ে গেলে আমরা সিমলে দারজিলিং থেকে আবার দেশে নেমে পড়ি। আমার বিশ্বাস আমাদের কাব্যে দর্শনে পুঁথিতে পঁজিতে যে “ভবসাগর” উত্তীর্ণ হওয়া জীবনের প্রধান কর্তব্য বলে উল্লিখিত হয়েছে, সে ভবসাগর

হচ্ছে কালাপানী। এবার মরে আমরা কে না আবার বিলেতে জন্মাতে চাই!

দেখতে পাচ্ছ গরমে আমার মাথা খারাপ হয়ে গিয়েছে নইলে এত বেকাঁস বকি! আসল কথা এই যে, নববর্ষ আমাদের প্রাণে নব হর্ষ না আনুক, আমাদের মনে নব-আশা এনে দেয়। বাইরে বাড় বইলেও মানুষ তার অন্তরে “ন মুঞ্চতি আশা বায়ু” এ হচ্ছে শাস্ত্র বচন, তারপর ভাষাতেও বলে, “যতক্ষণ শ্বাস ততক্ষণ আশ”। অতএব সকলে মিলে, আশা করা যাক যে এবার বর্ষশেষে আমাদের হর্ষের কারণ ঘটবে।

( ২ )

গরম দেশে বাস করার ভিতর সুখ না থাক স্বস্তি আছে। সে দেশে মানুষ জীবনের বেশির ভাগ সময় ঘুমিয়ে, আর বাদবাকী অংশটা বিমিয়ে কাটাতে পারে। শ্রীযুক্ত বাল গঙ্গাধর তিলক প্রমাণ করতে ব্যস্ত যে বেদ উত্তরমেরুতে রচিত হয়েছিল, এ কথা সত্য কি মিথ্যা শুধু তাঁরাই বলতে পারেন, যাঁদের প্রথমত বেদের এবং দ্বিতীয়ত উত্তর-মেরুর সঙ্গে ঘনিষ্ঠ পরিচয় আছে, আমার নেই, অতএব উক্ত মন্ত্র প্রথমে উত্তরমেরুতে কিম্বা দক্ষিনমেরুতে উচ্চারিত হয়েছিল সে কথা বলতে আমি অপারগ। তবে বেদ যে গ্রীষ্ম প্রধান দেশের বাণী নয়, তার প্রমাণ “মা দিবাং সাপ্পি” এই বৈদিক নিষেধ বাক্য। আজও দেখতে পাচ্ছি শীতপ্রধান দেশের সভ্যতার মূলকথা ঐ একই। ইউরোপের দেবতারা যে জাগ্রত এ কথা কে অস্বীকার করবে? সে কালের আর্ঘ্যেরা এদেশে এসে আমাদের দিবানিত্রা ভাঙাতে একবার চেষ্টা



করেছিলেন, তারপর জলবায়ুর গুণে তাঁরা নিজেরাই তস্ত্রাভিত্ত হতে হয়ে পড়লেন, এবং দিবানিদ্রার নাম যোগনিদ্রা দিয়ে বেদের অবিরোধে সেই নিদ্রাসুখ অনুভব করতে লাগলেন এবং সেইসঙ্গে নানারকম পার-লৌকিক সূক্ষ্ণ দেখতে লাগলেন। তারপর ফাঁক পেয়ে আমরা বহুদিন ধরে দিবা আরামে ঘুম দিচ্ছিলুম, ইতিমধ্যে ইউরোপ থেকে আর এক দল আর্ধ্য এসে আমাদের সে নিদ্রা আবার ভঙ্গ করেছে। ইতিমধ্যে অবশ্য নানা দেশ থেকে নানা জাতি এসে আমাদের যথেষ্ট হয়রান পরিশান করেছে, কিন্তু “মা দিবাং সপিসি”—এ লুকুম আমাদের উপর তারা কেউ জারি করে নি। মোগল-পাঠান আমাদের দেহ নিয়ে অনেক টানাটানি করেছে কিন্তু তারা আমাদের মনের উপর হস্তক্ষেপ করেনি, অর্থাৎ তারা আমাদের দিবানিদ্রার ব্যাঘাত জন্মায়নি। বলা লাজল্য ঘুমোয় আসলে শরীর, মন শুধু শুয়ে পড়ে।

এই নব ইউরোপীয় সভ্যতাই আমাদের মনকে এমনি জাগিয়ে তুলেছে যে, সে মনে ওঁরবার এবং ছোটবার প্রবৃত্তি এক রকম অদম্য হয়ে উঠেছে। অথচ আমরা উঠতে গেলেই আমাদের বাসগৃহের ছাদ আমাদের মাথায় চড় মারে আর ছুঁতে গেলেই তার দেয়াল আমাদের বুকে ঘুঁষো মারে। আর অমনি আমরা বাঁ হাত মাথায় দিয়ে বসে পড়ে ডান হাত বুকে দিয়ে কান্না জুড়ে দিই। সে কান্নার সুর ললিত আর তার বুয়ো হচ্ছে এই যে, যে মাথার মত চরম মাথা আর যে বৃকের মত নরম বৃক পৃথিবীতে আর কোথাও নেই, ছিল না, এবং থাকতে পারে না, সেই মাথা ও সেই বৃক এত চোট লাগে। এই ব্যাপারটারই নাম হচ্ছে ভারতবর্ষের বর্তমান অশান্তি। এ অশান্তির ফল ভালই হোক আর মন্দই হোক, এর জন্ম দাত্রী ইউরোপের সাদা মানুষ, ভারতবর্ষের

কাল আদমি নয়। প্রথমত ইংরাজি শিক্ষা ঠুকঠাক করে আমাদের শুধু জনকতকের মনের নিদ্রাভঙ্গ করেছিল, তারপরে এই যুদ্ধ একঘায়ে দেশশুদ্ধ লোকের মনের নিদ্রাভঙ্গ করেছে। আজকের দিনে দেশের লোক কি চায় তা তারা ঠিক না জানলেও, যা আছে তাতে তারা যে সন্তুষ্ট নয় এ ত চোখে আঙুল-দেওয়া সত্য। আমাদের এ অশান্তির পরিচয় পেয়ে যারা অতিমাত্রায় বিচলিত হয়েছেন, তাঁরা বলেন, তোমরা যা চাও সে হচ্ছে আকাশের চাঁদ। তথাস্তু। কিন্তু চাঁদ চেয়ে তার পল্লিবর্তে অর্দ্ধচন্দ্র পেলে মানুষের বুক ত জুড়িয়ে যায়ই না, উপরন্তু মাথা গরম হয়। দেশের কথা এইখানেই খতম করা যাক। ও-কথা বলতে গেলেই হা ছতাশ করতে হয় এবং আমার বিশ্বাস আমরা সাহিত্যে দীর্ঘ নিঃশ্বাসের যথেষ্ট অপব্যয় করেছি, এখন অন্তত কিছু দিনের জন্ম, আমাদের পক্ষে প্রাণায়াম অভ্যাস করা কর্তব্য-মনের বলাধানের জন্ম।

( ৩ )

দেশের অশান্তির কথা ছেড়ে দিয়ে এখন বিদেশের শান্তির কথা পাড়া যাক। এ বিষয়ের বিচার আমরা খুব দূর থেকে খুব একটা উঁচু জায়গায় বসে করতে পারব, অতএব এ ক্ষেত্রে আমাদের রায় যথেষ্ট উদার, যথেষ্ট নিরপেক্ষ হবে; বিশেষত সে রায়ের যখন কোনও ফয়সালা নেই। পরের সমস্তার সহজ মীমাংসা কে না করতে পারে? তা ছাড়া এ বিষয়ে মতামত দেবারও আমাদের সম্পূর্ণ অধিকার জন্মেছে। ভারতবর্ষ হচ্ছে League of Nations, একটি Original member অর্থাৎ এই যুদ্ধের ফলে আমাদের আর

কিছু লাভ হোক আর না হোক আমরা গাছে না উঠতেই এক কাঁধি নামাবার অধিকার পেয়েছি। “কিমাশচর্যমতঃপরম্!”

ইংরাজিতে একটি প্রবচন আছে যে, “মন্দের ভিতর থেকে ভাল বেরয়”। এই যুদ্ধটা যতই আত্মরিক, যতই পাশবিক হোক না কেন, এর ভীষণ আর্ভনাদের ভিতর থেকে একটা আকাশ বাণী শোনা গিয়েছে। এর দিগন্তব্যাপী তোপের আওয়াজ ভেদ করে এই কথাটা বেরিয়ে এসেছিল যে, এ হচ্ছে প্রভুত্বের বিরুদ্ধে স্বাধীনতার যুদ্ধ। এই আকাশ বাণীতে আমিও বিশ্বাস করেছিলুম, কেননা এ হচ্ছে আশার বাণী। জানই ত মানুষে যাকে বিশ্বাস বলে সে শুধু আশারই বনামদার, স্ততরাং ইউরোপের শাস্তি-বচনে বিশ্বাস স্থাপন করে’ আমি নিবুদ্ধিতার পরিচয় দিই নি, পরিচয় দিয়েছি শুধু এই সত্যের যে, আমিও মানুষ অর্থাৎ মূলত আশাজীবী।

তবে আমার প্রকৃতি হচ্ছে এই যে, আশাই বলো আর বিশ্বাসই বলো, যতক্ষণ না তা স্পষ্ট একটা আকার ধারণ করে, ততক্ষণ তা মনের ভিতর দিয়ে শুধু আনাগোনা করে, সেখানে আসন পায় না। এই সংহার-নাটকের যখন দম ফুরিয়ে আসবে তখন তা যে মিলনাস্ত হবে আমার এ বিশ্বাস থাকলেও উপসংহারটা যে ঠিক কি রকম হবে, সে সম্বন্ধে আমার কোনও স্পষ্ট ধারণা ছিল না। অতঃপর উইলসন সাহেবের কল্পিত সাদ্ধোপাস্ত শাস্তির প্রস্তাব যখন মুর্ত্তমান হয়ে বিশ্বমানবের চোখের স্তম্ভে খাড়া হল তখন মহা উৎফুল্ল হয়ে উঠলুম, কেননা শুধু যে ধরাছোঁয়ার মত একটা জিনিষ পেলুম তাই নয়, দেখা গেল তাঁর মনগড়া শাস্তির চৌদ্দটি পদ আছে। বাঙলার জনৈক রসিক লেখক বলে গিয়েছেন যে, “রচনটা গল্প কি গল্প তা

চেনা যায় শুধু চোদায়”। এই সূত্রের উপর নির্ভর করে, সহজেই বিশ্বাস করেছিলুম যে এই সংহার নাটকটি অতি বিজিগিচ্ছি গল্প হলেও এর উপসংহার হবে গল্প, শুধু গল্প নয়, একেবারে চতুর্দশপদী কবিতা, ইংরাজিতে যাকে বলে ‘সনেট’। এতে মনে একটু অহঙ্কারও হলো এই ভেবে যে শেষটা জয় আমাদেরই হলো কেননা উইলসন সাহেব আমাদেরই দলের লোক অর্থাৎ তিনি একাধারে অধ্যাপক ও সাহিত্যিক। ভাল কথা উইলসন সাহেবের Essays পড়েছে? চমৎকার লেখা। যে হাত থেকে State নামক হাজার ছুয়েক শুকনো পাতার গ্রন্থ বেরিয়েছে, সেই হাত থেকে যে অমন সব সরস প্রবন্ধ বেরতে পারে, এ ধারণা আমার ছিল না। মধ্যে থেকে একটি অবাস্তর কথা বলে নিলুম, এই প্রমাণ করবার জন্ম যে আইনের অধ্যাপক হলেও মানুষে অবসর মত রসালোপ করতে পারে। যাক ও সব কথা, এখন আবার শাস্তির প্রসঙ্গে ফিরে আসা যাক। আমরা ত আশা করেছিলুম মস্ত কিন্তু ফলে দাঁড়াল কি?—

দেখা যাচ্ছে যে এই কুরুক্ষেত্রে জয়যুক্ত পঞ্চপাণ্ডবের হাড়গড়া সন্ধিপত্রে যা আছে, সে হচ্ছে শুধু দেনা পাওনার হিসেব নিকেশ, আর পৃথিবীর জমির ভাগ বাঁটোয়ারা, এক কথায়, শুধু জ্যামিত্তি আর পাটিগণিত। “আশার ছলনে ভুলি কি ফল লভিমু হায়”— কবিতার বদলে অঙ্ক! আমরা চেয়েছিলুম দেখতে সভ্যতার একটা নতুন প্রাণ চিত্র কিন্তু দেখতে পাচ্ছি শুধু পৃথিবীর একটা নতুন মানচিত্র।



আজীবন রেখা ও সংখ্যা নিয়ে কারবার করেছেন। কিন্তু পৃথিবীতে এমন লোক পাওয়া দুর্লভ যিনি একাধারে পাকা জরিপ-আমিন ও পাকা সুমোর-নবিশ, কেননা মানব সমাজে কেউ পারে মাগতে আর কেউ পারে গুণতে। মহামান্য কলিকাতা উচ্চ আদালতে একদল উকিল আছেন যারা নাকি ম্যাপ বোঝেন ভাল, আর উক্ত আদালতে একদল ব্যারিস্টার আছেন যারা নাকি হিসেব বোঝেন ভাল। এ কথা আমি বিশ্বাস করি। মোটামুটি মানুষ ঐ দুই ধাতেরই হয়ে থাকে। লোকে বলে আমাদের দেশে পলিটিক্সের যে দু'-দল হয়েছে, তার কারণ এরা দু'দল দু'জাতের লোক, মডারেটরা বোঝে ভাল হিসেব, আর Extremists-রা নঞ্জা! আমি যে এ দু'দলের কোন দলেরই নই, তার কারণ আমার কলমের মুখ দিয়ে যা বেরয় তা রেখাও নয় সংখ্যাও নয়, ছেরেপ অক্ষর। সীমার জ্ঞান ও অর্থের জ্ঞান আমারও আছে, কিন্তু সে অল্প ক্ষেত্রে। তবে পৃথিবীতে থাকতে হলে, যোগ-বিয়োগ-গুণ-ভাগের সঙ্গে একটা মোটামুটি রকমের পরিচয় সকলেরই হয়, আমারও হয়েছে। সেই পরিচয়ের বলে আমি বলি, পৃথিবীর একটা নতুন নঞ্জা পাঁচজনে সহজেই তৈরি করতে পারে কিন্তু বিশ্বমানবকে সেই সঙ্গে পঙ্কীকৃত করা তাদৃশ সহজ সাধ্য ব্যাপার নয়। মাটিকে আমরা ইচ্ছে ভাগ করতে পারি, মানুষের সঙ্গে মানুষের যোগ-বিয়োগ করা নিয়েই ত যত মুস্কিল। যুদ্ধ মাটি নিয়েই হয়, শান্তি কিন্তু মানুষের উপর প্রতিষ্ঠিত।

প্রথমেই দেখনা কেন, পাঁচজনে মিলে যত সহজে পৃথিবীর কালী করেছেন তত সহজে তার নঞ্জা তৈরি করতে পারছেন না। গোল

বেধেছে তার রঙ দেওয়া নিয়ে। এ মানচিত্রে রেখার সঙ্গে বর্ণের মহা ঘন্দ বেধে গিয়েছে, বর্ণ কোথাও বা সীমারেখাকে অতিক্রম করতে চাচ্ছে কোথাও বা বিভক্ত হতে আপত্তি করছে। জর্মানী বলছে, এ সন্ধি ত আসলে বিচ্ছেদ। অপর পক্ষে ইতালি বলছে, এ সন্ধিতে ত সমাস হল না। এই দুই আপত্তিই উঠেছে বর্ণের দিক থেকে। এ দুই আপত্তির এমন কোনও সছত্তর নেই যা সকলে বিনা বাক্যব্যয়ে গ্রাহ্য করে নিতে বাধ্য, তার কারণ ইউরোপের এই নূতন ভাগ বাটোয়ারার গোড়ায় একটা গলদ আছে।

এই নূতন বন্দোবস্তের গোড়ার কথা হচ্ছে Self-determinations of Nations অথচ nation যে কাকে বলে সে বিষয়ে এই বন্দোবস্তকারীদের মনে কোনও স্পষ্ট ধারণা নেই। Nation-এর মূল কোথায়, জমিতে না জাতিতে? যারা একদেশে বাস করে তারা সকলে মিলে যদি একটি nation হয় তাহলে তাদের জমি ভাগ করে নিলে তাদের nationality রক্ষা হয় না। এই হচ্ছে জর্মানীর কথা। অপর পক্ষে যারা এক জাতের লোক তারা সকলে মিলে যদি একটি nation হয় তাহলে বিদেশকে আত্মসম্মান না করলে তাদের nationality-ও পূর্ণাঙ্গ হয় না। এই হচ্ছে ইতালির কথা। Nation শব্দের এই দুটি বিরোধী অর্থের সমন্বয় করতে গিয়েই যত গোলযোগ উপস্থিত হয়েছে। আসল কথা ও-দুয়ের কোন অর্থই পরীক্ষায় টেকে না, কেননা এক চৌহদ্দির ভিতর যেমন নানা জাত বাস করে তেমনি এক জাতের লোক নানা দেশে বাস করে। তা ছাড়া ইউরোপের কোন প্রদেশই একদেশ নয়; কেননা তার প্রতি দেশের চৌহদ্দি ক্রমাগতই বদলাচ্ছে; ইউরোপের কোন জাতিই একজাতি

নয় কেননা তার প্রতি জাতির শরীরে নানা জাতির রক্ত আছে। এক কথায় ইউরোপের সব বর্ণই সঙ্কীর্ণ বর্ণ এবং এ বর্ণের ধর্ম হচ্ছে চারিটে যাওয়া, কতকগুলি সরল রেখার ভিতর তাকে আটক রাখবার যো নেই।

কাব্যে দর্শনে বিজ্ঞানে, nation শব্দের যে অর্থই হোক পলিটিক্‌সে ও-শব্দের অর্থ হচ্ছে সেই জনসমূহ যারা এক রাজ্যভুক্ত এবং যাদের ভিতর সর্ব প্রধান বন্ধনসূত্র হচ্ছে চিরাগত একশাসন, একপালন। প্রতি nation নিজের মনে নিজের nationality-র ভিত্তি যাই ভাবুক, প্রতি nation অপর সকল nation-কে শুধু পলিটিক্যাল nation হিসাবেই মানে এবং তার সঙ্গে কারবার করে। রাজনীতির দরবারে এই হিসেবটাই সব চাইতে বড় হিসেব বলেই রেখার সঙ্গে শুধু বর্ণের নয় সংখ্যারও বিবাদ ঘটে। পলিটিক্‌সে লোকবলও একটা কম বল নয়, স্তরায় ইউরোপের এই নতুন বন্দোবস্তে যে nation-এর লোক সংখ্যা বাড়ছে সেই খুসি হচ্ছে আর যে nation এর কমছে সেই ব্যাজার হচ্ছে, অতএব এ কথা নির্ভয়ে বলা যায় যে, এ ভাগ বাটোয়ারা হচ্ছে ইউরোপের রাজশক্তির যোগ-বিয়োগ। উইলসন সাহেব আশা করেন যে ঐ মহাদেশের রাজশক্তির এই বিশ্লেষণ ও আল্পেষণের ফলে পৃথিবীতে চিরশান্তি বিরাজ করবে। কিন্তু এ আশা ফলবতী হবে কি না, সে বিষয়ে তিনিই আমার মনে একটু খটকা লাগিয়েছেন। মানুষ যে কত নির্বোধ তার একটা উদাহরণ তাঁর New Freedom গ্রন্থেই পড়েছি। উইলসন সাহেব বলেন যে Newton যখন এই জড়-জগতের laws of motion আবিষ্কার করলেন, তখন ইউরোপ ধরে নিলে যে ঐ একই law রাজনীতিতে প্রযুক্ত্য, অমনি সে দেশের রাজমন্ত্রীরা

balance of power-এর সৃষ্টি করতে বসে গেলেন। এ balance টিকলে না, কেননা জড়জগৎ আর মনোজগৎ এক নিয়মের অধীন নয়। এখন জিজ্ঞাসা করি আজকের দিনে বড় বড় রাজমন্ত্রীরা সেই পুরোণো balance of power ছাড়া আর কি রচনা করতে বসেছেন? নূতনত্বের মধ্যে এইটুকু যে, এবার নাকি এ balance তার গড়নের হিকমতে মানবসমাজকে stable equilibrium দান করবে। মানবজীবন কিন্তু ঘড়ির পেণ্ডুলমের মত। ঘড়ির দম বন্ধ না হলে ওর দোল বন্ধ হয় না। অতএব এ পৃথিবীতে মানুষ যতদিন বেঁচে থাকবে ততদিন সে কোন একটা অবস্থায় স্থির থাকবে না। একমাত্র যত্নই মানুষকে চিরশান্তি দিতে পারে। মহাভারতে দেখতে পাই স্বর্গারোহণ পর্ব ও শান্তি পর্বের মধ্যে আরও অনেকগুলি পর্ব আছে। সূতরাং এই শান্তি পর্বই যে ইউরোপের ইতিহাসের শেষ পর্ব, এ কথা বিশ্বাস করা কঠিন।

( ৫ )

ইউরোপ মায় আমেরিকা সমগ্র পৃথিবী নয় এবং ইউরোপের বাইরেও মানুষ আছে সূতরাং দেখা যাক, তাদের কি ব্যবস্থা হল।

এই শাস্তির দরবারে স্থির হয়ে গিয়েছে যে সমগ্র আফ্রিকা এবং বেশির ভাগ এশিয়ার সব জাতিই নাবালক। পলিটিক্যাল হিসেবে যারা স্মার্ট নয় পূর্ববর্তী বলেছি ইউরোপের কোন Nation-ই তাদের সাবালক বলে স্বীকার করে না। তাই এই নাবালকদের জন্ম সব উচ্চ নিযুক্ত করা হয়েছে, এবং যতদিন তারা সাবালক না হয় ততদিন এই উচ্চিরাই তাদের শাসন-সংরক্ষণ করবে। এ অতি উত্তম ব্যবস্থা।



তবে এই প্রশ্নটা মনে সহজেই উদয় হয়, এই নাবালকেরা কবে সাবালক হবে?—নাবালকের উচ্চ নিযুক্ত করা মাত্র যে তার নাবালকত্বের মেয়াদ বেড়ে যায় ইউরোপের সকল আইনের ত এই কামুন। তারপর সুনতে পাচ্ছি উক্ত উচ্ছিন্ন এই সব নাবালকদের শিক্ষার ভার হাতে নেবেন—তাদের মানুষ করে তোলবার জন্ম। এ অবস্থা ভরসার কথা, তবে ভয়ের কথা এই যে, ইউরোপীয় মতে শিক্ষা-পদ্ধতির একটা মোটা কথা এই যে, "Spare the rod and spoil the child."

যাকগে ও সব পুরের কথা। আমাদের অবস্থা যে ঠিক কি দাঁড়াল সেটা এখন ঠিক বোঝা যাচ্ছে না। League of nations-এর হিসাবে আমরা হলুম সাবালক আর nation হিসেবে থাকলুম নাবালক। একসঙ্গে সাবালক ও নাবালক দেখতে পাচ্ছি পৃথিবীতে আমরা ছাড়া কেউ হতে পারে না, আমরাই হচ্ছি মানবসমাজে একমাত্র living contradiction, এবং সম্ভবত এই contradiction-টা আবহমান কাল living থাকবে।

এত লম্বা বক্তৃতা করবার উদ্দেশ্য এই প্রমাণ করা যে, পৃথিবীর ভাবনা ভেবে কোনও লাভ নেই। ও-বস্তুটা যখন গোল তখন ওকে চৌকোস করবার চেষ্টা বৃথা; বিশেষত তাদের পক্ষে যাদের হাতে হাতুড়ি নেই। তার চেয়ে Voltaire-এর উপদেশ শিরোধার্য করা চের ভাল। মানুষের কাছে তাঁর শেষ কথা এই—

"Cultivate your garden"—অতএব এসো তুমি আমি সাহিত্যের চর্চা করি, কেন না আমরা ঐ সাহিত্যের চাষ ছাড়া আর কিছু করতে পারব না।

( ৬ )

আর এক কথা, কোমর বেঁধে সাহিত্যের চাষ করাও আমাদের পক্ষে কর্তব্য। ভারতবাসীর মন গড়ে তোলবার দায় বর্তমানে বিশেষ করে বাঙালীর ঘাড়েই পড়েছে, এবং সে দায় এড়াবার আমাদের অধিকার নেই, কেননা এ দায় আর কেউ বহন করতে পারবে না।

এ যুগে সমগ্র ভারতবর্ষকে আমরা একটি বিরাট পুরুষরূপে দেখতে শিখেছি, ভারতবর্ষের বিভিন্ন প্রদেশগুলি যার শুধু অঙ্গ প্রত্যঙ্গ মাত্র। কোন প্রদেশ তার কোন অঙ্গ তাও একরকম ঠিক হয়ে গিয়েছে। পাঞ্জাব যে এই বিরাট পুরুষের বাহু আর বোম্বাই যে তার উদর এ বিষয়ে দেশশুদ্ধ লোক এক মত। পূর্বে আমরা দাবী করতুম যে বাঙলাই হচ্ছে বর্তমান ভারতের হৃদয়, অতএব মাত্রাজ তার পদ। মাত্রাজ অবশ্য এতে আপত্তি করত এবং সে আপত্তি হালে হোমরুল দলে গ্রাঁহ হয়েছিল। এই দলের পলিটিসিয়ানদের মতে, ভারতবর্ষের হৃদয় এখন তার বাঁ-দিক থেকে বদলি হয়ে ডানদিকে, এক কথায় বাঙলা থেকে সরে গিয়ে মাত্রাজে স্থিতিলাভ করেছে। এ কথার প্রতিবাদ করবার আমাদের প্রয়োজন নেই, কেননা আমাদের কাছ থেকে ভারতবর্ষের হৃদয় কেড়ে নিলেও তার পা আমাদের ঘাড়ে অত্যাধি কেউ চাপিয়ে দেয় নি। কেন দেয় নি, তার ভিতর একটু রহস্য আছে। আমাদের নব-পেট্রি যটরা ইতিমধ্যে আবিষ্কার করেছেন যে, এ বিরাট পুরুষের পা বলে কোন অঙ্গই নেই, এ যে চলে না, এই হচ্ছে এর বিশেষত্ব ও মহত্ব। এ কথা আমরা সকলেই মানতে বাধ্য, কেননা

জনরব যে এই নব-পেট্রি যটরাই হচ্ছেন দেশের আগামী শাসনকর্তা । তাহলেই দেখা যাচ্ছে যে বাকী থাকল শুধু একটি অঙ্গ—মস্তক । তাই আজ আমরা দাবী করতে পারি যে, বাঙলাই হচ্ছে ভারতবর্ষের মস্তক, আমাদের এই দাবীর বিরুদ্ধে কারও কিছু বলবার নেই, কেননা ও-অঙ্গের ভার নিজস্বক্লে নিতে আমরা ছাড়া আর কেউ রাজি হবে না । ওর অন্তরে মস্তিস্ক নামক যে পারার মত পদার্থটি আছে—তা মানুষের মনকে শেখায়-পড়ায়, তার বাহ্যকে শাসন করে, তার উদরকে অতি মাত্রায় স্ফীত হতে দেয় না, তার হৃদয়ের রক্তকে পরিষ্কার করে, তার পরে তা এমন সব জায়ের বিধান দেয় যা মেনে চলা রক্তমাংসের শরীরের পক্ষে বড়ই কষ্টকর । এ ছাড়া ঐ মস্তিস্ক নামক পদার্থটি “আইডিয়া” নামক এক অবস্তুর সৃষ্টি করে যাকে অন্তরে স্থান দিয়ে মানুষের সোয়াস্তি থাকে না, অথচ যার কাছ থেকে একদম পালানও মানুষের পক্ষে একেবারে অসম্ভব । এ অবস্তুর চর্চা কাজের লোকেরা একেবারেই করতে নারাজ ; অতএব এর চর্চা এ যুগে আমাদেরই করতে হবে, কেননা আমরা যে জাতকে-জাত যে unpractical, এ সত্য ত দর্শনলোক-বিদিত । এই খানেই মনে করিয়ে দিই যে মানুষকে যাকে সাহিত্য বলে—তার জন্মস্থান হচ্ছে ঐ মস্তিস্ক । স্ততরাং আমরা যখন প্র্যাকটিকাল নই তখন আমাদের পক্ষে একমনে সাহিত্য রচনা করাই শ্রেয়, বিশেষত যখন আমরা না করলে ও-কাজ ভারতবর্ষে আর কেউ করবে না । ভাববার চিন্তাবার আর কারও সময় নেই তারা সব বড় কাজে ব্যস্ত ।

বীরবল ।

## ভবভূতি ।

—:—

কি মেঘ গভীর স্রোক উঠিলে উচ্চারি,  
নির্ভয় প্রবল কণ্ঠে কি মহা বন্ধার !  
সহস্র বর্ষেরো পরে প্রতিধ্বনি তারি,  
আছে ভরি ভারতের প্রান্তর কান্তার ।  
তবু কি করণ গীতি, তবু কি মধুর !  
ক্রন্দনে লুটায় পড় এমন কান্তর !  
বীরের বিরহ-গাথা অপরূপ স্থর ;  
কুসুম-কোমল তুমি হে বজ্র-কঠোর !  
এত প্রেম কে শিখালে তরুণ ব্রাহ্মণ ?  
এত গর্বি ? তবু তুমি কর নাই ভুল ;  
শোভিল তোমারি ভালে বিজয়-চন্দন ;  
—কাল নিরবধি আর পৃথিবী বিপুল ।  
আজি যে সহস্র কণ্ঠে উঠে তব স্বতি  
হে কঠিনে স্বকুমার কবি ভবভূতি !

৪ঠা মাঘ ১৩২৫ ।

শ্রীশৈলেন্দ্রকুমার লাহা ।



## প্রতিধ্বনি ।

—:~:—

প্রতিধ্বনি, প্রতিধ্বনি, চারিদিকে শুধু  
প্রতিধ্বনি । কে আছে নির্ভীক বীর হেথা ?  
এই বন্ধ, অন্ধ কারাগৃহ ভাঙ্গি, বঁধু,  
ধ্বনিরাজ্যে নিয়ে যাও ; দূর কর ব্যথা ।  
যুগযুগান্তর পূর্বের কোন্ কথা কবে  
উচ্চারিত হ'য়েছিল প্রতিশব্দ তার  
প্রাচীর প্রহত হ'য়ে, বার বার, বার,  
ফিরে আসে দ্বিগুণিত ত্রিগুণিত রবে ।  
যদি এর আবেষ্টনী ভেঙে ফেলা যেত !  
আকাশের তলে শব্দ যদি প্রাণ পেত ।  
কি আনন্দে মাতিয়া উঠিত দশদিক,  
মানুষ কি চোখে ধরা দেখিত চাহিয়া,  
জীবন কি গান জানি, উঠিত গাহিয়া ।  
ধ্বনিরাজ্যে, নিয়ে যাবে কে মোরে, নির্ভীক ?

২২শে মার্চ ১৩২৫ ।

শ্রীশৈলেন্দ্রকুমার লাহা ।

## শ্রেয় ।

—:~:—

দার্শনিক-বিজ্ঞ কহে—তারে বল শ্রেয় ?  
অবিচার মোহ সেতো মানব অন্তরে ।  
বিদেশী পিতৃল সেও স্বর্ণরূপ ধরে,  
তারে বল আর কিছ—সে তো নহে হেম ।

বৈজ্ঞানিক হেসে কহে—স্বজনের ধারে  
বৃত্তি এক প'ড়ে আছে প্রকৃতিরচন,  
অভাব স্বভাব সৃষ্টি—জনমে জীবন  
যৌন-নির্ব্বাচন বৃত্তি—শ্রেয় বল তারে ?

কবি কহে—পণ্ডিতের বন্ধ্যাহিয়া মাঝে  
শ্রেয়ের জনম কভু সম্ভবে না সাজে ।

সেতো কভু দেখে নাই রাধিকার সনে  
কুঞ্জে বসি—সারা বিশ্ব শুধু শ্যামময়,  
বাঁশীটি বাজেনি যার হৃদি-বৃন্দাবনে  
সে কভু বৃষ্টিতে পারে—শ্রেয় কারে কম ।

শ্রীকান্তচন্দ্র ঘোষ ।

## রূপ ।

—:~:—

নিম্নে নিমেষের প্রাণ  
হাসিয়া পলক,  
ফুলের এলান বকে উষার আলোকে খুলিয়া ঝলক,  
কোথায় মিলায় !

কাটে,—সে পরশটুকু ভাবিয়া ফুলের, আকুল দিবস  
তার অজানায় !

মিলাইয়া গিয়াছে নিমেষে,  
তাই সে—অমিয়-গলা শিশিরের কণা ;

কুসুমের সকল জীবন  
ঘিরিয়া থাকিত যদি হ'ত সে—বেদনা ।

এলে তুমি ঘোবনের  
শ্রাবণ উষায়,  
ঢালিয়া হৃদয় মনে অযুত সাধনে আকাঙ্ক্ষা আশায়  
যে রূপ-প্রাণ,  
প্রাণের গোপনে সে যে যুমায়ে পড়েছে, তারি স্বপনেতে  
বিভোর জীবন !

রূপ সে যে বাঁশরীর সুর,  
কাঁপিয়া কাঁপিয়া দূরে উড়ে চলে যায় ;

সুকৃত্যর নিবিড় অন্তর  
পরশে শিহরি দিয়া নিভৃত যুমায়ে ।

শ্রীসুরেশানন্দ ভট্টাচার্য্য ।

## উড়ো-চিঠি ।

—:~:—

এপ্রিল ২২, ১৯১৯ ।

জীবনকুমার

তোমার উপরে আমি যে মনে মনে একটু বিরক্ত ছিলাম সেটা  
তোমার কাছে আজ আমার স্বীকার করতে বিধা নেই, কেননা তোমার  
শেষ চিঠি পড়ে' একেবারে ডবল খুসি হয়েছি। তুমি হয়ত  
মনে মনে ভাববে যে, সে চিঠিখানার মধ্যে এমন কি অপরকে খুসি  
করবার মত পরমাশ্চর্য্য খবর ছিল ! তা যে-খবর ছিল সেটা হচ্ছে  
এই যে, তুমি একটা কিছুর বলে' মনস্থ করেছ।

আমার দ্বিতীয় দফা খুসি হবার কারণ হচ্ছে এই যে, তুমি সাহিত্য-  
সেবায় জীবন উৎসর্গ করতে মনস্থ করেছ। আমার বিশ্বাস যে,  
“Pen is mightier than the sword,” এ-কথাটা একটুকু  
অতিরঞ্জিতও নয়, অতি-মণ্ডিতও নয়। লেখনী অসির চাইতে  
mightier ত বটেই, সেই সঙ্গে সঙ্গে তা subtler-ও। লোকের  
হৃদয় যে ক্ষত্রিয়ের চাইতে উঁচুতে ধরা হয়েছে সেটা খামখেয়ালেও  
নয়, বা খোসাখেয়ালীতেও নয়। অসি দান করে—মৃত্যু, আর  
লেখনী—অমৃত। অসি জীবন নিতেই পারে—লেখনী জীবন  
দিতেও পারে। তাই ত এ দেশে আজ লেখনীর এত প্রয়োজন,  
অবশ্য যদি সেই লেখনীর পিছনে এমন একটা মস্তিষ্ক থাকে যে-



মস্তিষ্কের চিন্তাশীলতা অধর্ষ নয় অকর্ষও নয়। তবে তুমি সাহিত্য-মন্দিরের পূজারি হয়ে কেবলই পুরোনো মন্ত্র আওড়াবে, না নিজে উযোগ্য করে' সেই সঙ্গে সঙ্গে একটু ধ্যান ধারণাও করবে তা শুধু তোমার উপরেই নির্ভর করে। তবে তোমাকে এইখানে এই কথাটা বলে' রাখছি যে, মন্ত্রের যে গুণ তা মানুষের জিহ্বা দস্ত ওষ্ঠ কণ্ঠ তালু ইত্যাদি Vocal instruments-গুলোর মধ্যেই নেই, আছে তা তার অন্তরে, যেখানে মানুষ বচনশীলতায় মুখর সেখানে নেই, আছে তা যেখানে সে আত্মোপলব্ধিতে প্রথর। মন্ত্র হয়ে ওঠে কেবল বাঁকা, যখন সেই মন্ত্রের সঙ্গে মানুষের আত্মার কোনই সম্বন্ধ থাকে না। বাক্যের জোর তখনই, যখন তা হয়ে ওঠে মন্ত্র, মন্ত্রের গুণ তখনই যখন তা সেই মানুষের আত্মার সত্যে ও শক্তিতে অভিবিস্কৃত।

কিন্তু সাহিত্য-সেবায় তুমি জীবন উৎসর্গ করবে জেনে স্বধী হলেও আমি তোমার একটা প্রশ্ন শুনে একটু দমে গিয়েছি—সাহিত্য-জগতে তোমার সাফল্য সম্বন্ধে। তুমি যে জিজ্ঞেস করেছ, আজ যে বাঙলা দেশের সাহিত্য-সভায় দুটা দল গড়ে' উঠল, যার এক দলকে পুরাতন ও অল্প দলকে নূতন-পন্থী নামে অভিহিত করা হয়ে থাকে এই দু' পন্থীর মধ্যে কোন পন্থা পাস্তুরনের শ্রেয়? এ প্রশ্নে তোমার কৃতার্থতা সম্বন্ধে আমি সন্দেহই একটু দমে' গিয়েছি এই জ্ঞেয়ে যে, ও-প্রশ্নের অর্থই হচ্ছে সন্দেহ ও সংশয়। আর সন্দেহ ও সংশয়ের মানে হচ্ছে নিজের অন্তর থেকে সেই বিষয়ে একটা কোন স্পষ্ট তাগিদ না আসা। অন্তরের এই তাগিদই হচ্ছে মানুষের সত্য; স্মৃতরাং সেই পন্থাই তার পন্থা। মানুষ যতক্ষণ না এই রকম তাগিদ তার অন্তর থেকে পায় ততক্ষণই তার প্রশ্ন—এটা করি না ওটা

ধরি? এ রকম দু' নোকোর' পা রাখলে আর বাই হোক, নোকো' চলে না। কিন্তু বা হোক এ সম্বন্ধে তোমার আমি একটা ব্যক্তিগত মত দিতে পারি। আমার দৃঢ় ধারণা যে বাঙলা-সাহিত্যে আজ আমরা যে পন্থাই অবলম্বন করি না কেন, আজ আমরা সেখানে বৌদ্ধ দৌহার-সুর ভাঁজতে গেলে যতখানি ঠকব, বৈষ্ণব পদাবলীর তান সাধতে গেলেও ঠিক ততখানিই ঠকব। কেননা আজ আমরা বৌদ্ধও নই বৈষ্ণবও নই—অর্থাৎ অন্তরে।

আসলে পুরাতন পন্থা ও নূতন পন্থা কতকটা সত্যি হলেও ও-সম্বন্ধে তর্কটার অনেকখানিই বাজ। বাঙলা-সাহিত্য সম্বন্ধে আসল খাঁটি কথা যেটা সেটা হচ্ছে এই যে, তা প্রথমে বাঙলা হওয়া চাই, দ্বিতীয়ত তা সাহিত্য হওয়া চাই। এই হলেই আর কোন সংজ্ঞাই সেটাকে বাঙলা-সাহিত্যের ফলাহারে আপাতক্লেয় করে' রাখতে পারবে না।

এত বড় একটা কথা'র মুখে তর্কের খাতির তুমি জিজ্ঞেস করতে পার যে, যদি কোন বাঙালী ঔপন্যাসিক কামস্কাটকাবাসী এক জোড়া যুবক-যুবতীর প্রণয়-কাহিনী বর্ণনা করে' একখানা উপন্যাস লেখেন তবে সে গ্রন্থকে বাঙলা-সাহিত্যের জাতে তুলে নিতে হবে কি না? তা বাঙলা-সাহিত্যে স্থায়ী আসন গেড়ে বসবে না কি?—নিশ্চয় তাকে জাতে তুলে নিতে হবে। সাহিত্য-বৃক্ষের নানা শাখা যেমন কাব্য উপন্যাস ইতিহাস ইত্যাদি। এখন যদি বাঙালী-ঐতিহাসিক বাঙলা-ভাষায় একখানি মেসিকোর' ইতিহাস লেখেন তবে তা বাঙলা-সাহিত্যের সম্পদ হবে কি না? মেসিকোর' ইতিহাস যদি বাঙলা-সাহিত্যের সম্পদ বৃদ্ধি করে তবে কামস্কাটকার প্রণয়-

কাহিনীই বা কেন করবে না? বাঙলা-সাহিত্যে স্বামী আসনের কথা, সেটা নির্ভর করবে তার দোষ গুণের উপরে—তা সাহিত্যের খাঁটি জিনিস, না মেকি মাল—তার উপরে।

এই খর না কেন, কৃত্তিবাস ও কাশীরামদাস যেমন রামায়ণ মহাভারতের গল্প নিয়ে বাঙলা রামায়ণ মহাভারত রচনা করলেন তেমনি যদি কোন কবি ইলিয়ড ও অডেসিস গল্প নিয়ে বাঙলা মহাকাব্য রচনা করেন, তুমি কি মনে কর তাহলে তা বাঙলা-সাহিত্যে ফেলা হ'য়ে থাকবে। বাঙালী-মনের এমন সংকীর্ণতা হবে না বলে আমাদের সবারই প্রাণপণে আশা করা উচিত। তা যদি হয় তবে ইংরেজি-সাহিত্যে শেক্সপিয়ারের হ্যামলেট, রোমিও-জুলিয়েত, ওথেলো ইত্যাদি নাকচ, বায়রনের ডনজুয়ান, চাইল্ড-হারল্ড ইত্যাদি কাব্যগুলো নাকচ—ফরাসী-সাহিত্যেরও ঐ রকম অবস্থা দাঁড়াবে। তোমার সূত্র অনুসারে দেখতে পাচ্ছ জগতের সাহিত্য-ক্ষেত্রে কি রকম একটা হলুফুল বেধে যাবে। এর উত্তরে যদি বল যে, অশ্ব দেশের সঙ্গে বাঙলা দেশের তুলনা! বাঙলা দেশ গড়ে উঠেছে divine dispensation-এ। তবে অবশ্ব নিরন্তর হয়ে থাকা ছাড়া আর অশ্ব উপায় নেই। তবে এইখানে তোমায় স্মরণ করিয়ে দিচ্ছি যে—

“এর চেয়ে হ'তেম যদি আরব বেহুইন

চরণ-স্তলে বিশাল মরু দিগন্তে বিলীন!

\* \* \* \*

থাকিতে নারি ক্ষুদ্র কোলে আশ্রয়ন ছায়ে”

এ মনের ভাব মানুষের একটা চিরন্তন ভাব। “আশ্রয়ন ছায়ে”র “ক্ষুদ্র কোণ” যতই গভীর কোণ হোক না কেন যতই মধুর কোণ

হোক না কেন, সেই খানেই মানুষের মন চিরকাল আঁটেবে না, আঁটেবে না। মানুষের জীবন-তারে গুণ গুণ করে একটা হুঁর চিরদিন, গুঞ্জিত হচ্ছে যদি কান পাততে জান তবে কান পেতে শোন, সে হুঁর হচ্ছে এ—

“এর চেয়ে হ'তেম যদি আরব বেহুইন

চরণ-স্তলে বিশাল মরু দিগন্তে বিলীন।”

এই হুঁর যে থামাতে চায় সে বুহৎকেই থামাতে চায়, মহৎকেই অস্বীকার করতে চায়—এ যেন সাক্ষ্য-আকাশের একটা মাত্র তারার পানে চেয়ে সমস্ত আকাশটাকেই ভুলে যাওয়া—সমস্ত আকাশটাকেই অস্বীকার করা।

সে যা হোক আমাদের সাহিত্যে নূতন ও পুরাতন এই শুক-শারীর ধ্বংসক্ষে আমায় যা মনে হয় তা তোমায় স্পষ্ট করে বলছি।

প্রথমে ছুঁদলের ছুঁজনা চরম পন্থীকে নেওয়া যাক। একজন বলছেন—আমাদের অতীতের অনুকরণ কর। আর একজন বলছেন—ইয়োরোপের অনুকরণ কর। আমার মনে হয় এ ছুঁজনের কেউই বর্তমানে বাঙলা-সাহিত্যে কোন স্বামী সম্পদ দিতে পারবেন না। কেননা অনুকরণ কথাটার অর্থ হচ্ছে মানুষ যা নয় তারই খেলা করা—যে ভঙ্গীটা আঙ্গার নয় সেই ভঙ্গীটা তার মনের ভিতরে কল্পনা করে তাই কালি কলমের সাহায্যে কাগজের উপরে আঁকা। কিন্তু সংসাহিত্য, স্বামী-সাহিত্য হচ্ছে তাই যাতে ফুটেছে আঙ্গার চেহারা। কেননা এক আঙ্গাই হচ্ছে সং—আঙ্গাই হচ্ছে অঙ্গর অমর অক্ষয়, কাল তাকে ধ্বংস করতে পারে না, আঙন তাকে পোড়াতে পারে না। এ হচ্ছে স্বয়ং শ্রীকৃষ্ণের কথা—যাঁকে আমরা পূর্ণ অবতার বলে মানি।



আসলে যে অতীতের ভিতর দিয়ে আমরা চলে' এসেছি সে অতীতকে আজ আমরা তুড়ি মেরে উড়িয়ে দিতে পারব না, আর আজ যে বর্তমানটা আমাদের সামনে এসে পড়েছে সেটাকে আমরা খুড়ি দিয়ে পাশ কাটিয়ে চলতে পারব না। আর এতে অপমান বোধ করবারও কোন প্রয়োজন নেই বা এতে প্রাচীন ঋষিদের গৌরব ক্ষুণ্ণ হ'ল কল্পনা করে' চোখের জল ফেলবারও কোন কারণ নেই।

আমাদের অতীতকে যে আমরা খুলতে পারব না আর আমাদের বর্তমানকে যে আমরা ভুলতে পারব না—ইচ্ছা করলেও নয়—এটা বিশেষ করে প্রমাণিত হয়েছে আমাদেরি সাহিত্য-সাধারণ-তন্ত্রের দু'জন শ্রেষ্ঠ সাহিত্যিকের জীবন দিয়ে। একজন হচ্ছেন মাইকেল মধুসূদন দত্ত আর একজন হচ্ছেন রবীন্দ্রনাথ ঠাকুর।

তুমি মাইকেলের জীবনী জান। ইয়োরোপীয় শিক্ষা দীক্ষা এদেশে আমদানী হবার পর বিলিতি সভ্যতার ঢেউয়ে মধুসূদন যেমন নাকানি-চুবানি খেয়ে ছিলেন বাঙলা দেশের কিম্বা সমস্ত ভারতবর্ষের আর কেউ তেমন খান নি। তাঁর আহার বিহার পোষাক পরিচ্ছদ ধর্ম কর্ম সব ছিল বিলিতি। কিন্তু তাঁর কলম থেকে স্থায়ী যা বেরুল তা হচ্ছে “মেঘনাদ-বধ”। আর এই “মেঘনাদ-বধ” কেউ যদি ইংরাজিতে অনুবাদ করে' বিলেতে ছাপান তবে তা পড়ে' এ কথা কেউ বলবে না যে তা একজন ইংরেজ কবির রচনা। মাইকেলের সার্ট-ওয়েষ্টকোট ফুঁড়ে যে আঙ্গা বেরিয়েছিল তা আর খাই হোক ইংলিশ-ম্যানের আঙ্গা নয়।

অন্যদিকে আবার আছেন রবীন্দ্রনাথ। ছেলেবেলায় তাঁর যা ইংরেজি শিক্ষা হয়েছিল সেটা চাটনি হিসেবে। এ-দেশে ত তিনি

ইংরেজি শিক্ষার “পিল” বরদাস্ত করতে পারলেনই না, বিলেতে গিয়েও যে তিনি সে শিক্ষাকে মটন চপের মতো কাঁটা চামচের সাহায্যে নির্বিবাদে উদরস্ত করতে পেরেছিলেন তা অন্তত তাঁর “জীবন স্মৃতি” পড়ে' মনে হয় না। তবুও আজ যদি কেউ তাঁর “গীতাবলি” মৈথিলি ভাষায় রূপান্তরিত করে তবে সেটা বিভাপতির রচনা বলে' কেউ ভুল করতেন না নিশ্চয়।

রবীন্দ্রনাথ যে একজন বড় কবি এ কথা তুমি মান। তাঁর প্রতিভা অমামুদী এটাও তুমি স্বীকার কর। এই রবীন্দ্রনাথই একদিন বৈষ্ণব কবিতার রূপে গুণে মুগ্ধ হয়ে সেই হুঁর আপনার হৃদয়-তন্ত্রীতে বাজীয়ে তোলবার চেষ্টা করেছিলেন। তারই ফল হচ্ছে “ভানুসিংহ ঠাকুরের পদাবলী”। এই “ভানুসিংহ ঠাকুরের পদাবলী” সম্বন্ধে রবীন্দ্রনাথ বেশি বলয়েসে যে মত প্রকাশ করেছেন তা তোমাকে এখানে শুনিতে দিচ্ছি। তিনি তাঁর “জীবন-স্মৃতি” তে লিখেছেন, “ভানুসিংহ যিনিই হোন তাঁহার লেখা যদি বর্তমানে আমার হাতে পড়িত তবে আমি নিশ্চয় ঠিকিতাম না একথা আমি জোর করিয়া বলিতে পারি। \* \* \* \*। ভানুসিংহের কবিতা একটু বাজাইয়া বা কসিয়া দেখিলেই তাহার মেকি বাহির হইয়া পড়ে। তাহাতে আমাদের দিশি নহবতের প্রাণগলানো ঢালা হুঁর নাই, তাহা আজকালকার সস্তা অর্গেনের বিলাতি টুং টাং মাত্র।” এই কথা বলে রবীন্দ্রনাথ যে নিষেধের রচনা সম্বন্ধে কেবল বিনয়ই প্রকাশ করেছেন তা মনে করবার কোন কারণ নেই। রাখাক্ষের গানে আজ আমরা “দিশি নহবতের প্রাণগলানো ঢালা হুঁর” দিতে পারি নে, কারণ এ যুগের আমরা রাখাক্ষকে ঠিক তেমনি সত্য করে'

পেতে পারিনে, যেমন করে' সে যুগের তাঁরা পেতেন। এই দেখছ না আজকাল আমরা রাখাক্ষেপ লম্বা-চওড়া আধ্যাত্মিক বা বৈজ্ঞানিক বাখ্যা দিতে হুকু করেছি। আর এইটাই প্রমাণ যে আজকার আমাদের রাখাক্ষেপের প্রতি প্রেম বা ভক্তির জমীখরচের ফাঙ্কিল দাঁড়িয়েছে। আসলে ভক্তির চাইতে আমাদের জ্ঞানের দিকটা বেড়েই চলেছে। তাই আজ গায়ের যমুনার কুলুকুলু রবই আমাদের হু' কান ছুড়ে বসে' নেই, আজ ধরণীর সপ্তসিন্ধুর কলকল ধ্বনিত্তে আমাদের চিত্ত ভরে' উঠেছে। ভক্তির দোষ সংকীর্ণতা— জ্ঞানের গুণ উদারতা। ভক্তির, সে হচ্ছে কৃপ; জ্ঞানের সে হচ্ছে বারিধি। ভক্তির কৃপ বলেই হয়ত তা শাস্ত ও শীতল, কিন্তু শাস্ত ও শীতলতাকে বড় করে বিশালতাকে কে অস্বীকার করবে ?

এইখানে তুমি নিশ্চয় তর্ক তুলবে। তুমি বলবে যে রবীন্দ্রনাথের ছেলে বয়েসের কাঁচা রচনায় পাকা রঙের ও রসের আশা করা অস্বাভাবিক। এবং সেই আশা করে' এবং তাই না পেয়ে তারই উপরে সমস্ত বাঙালী কবির, তথা সমস্ত বাঙালী জাতির, mental Psychology-র ব্যাখ্যা দাঁড় করান কেবল তর্কে জয়লাভ করবার অশ্রুই। তুমি হয়ত বলবে যে রবীন্দ্রনাথ যদি ঐ পথ প্রাপ্যপথে আঁকড়ে থাকতেন তবে হাত পাকবার সঙ্গে সঙ্গে তাঁর কলমের মুখ থেকে এমনি সব পদাবলী ফুটে বেরত যা “খেয়া”র সুর বা “গীতাঞ্জলি”র গানকে ছাড়িয়ে উঠত। কিন্তু রবীন্দ্রনাথের প্রতিভা গোপবালাদের মতো যে যমুনা-পুলিনের পথ ধরে' চলল না এইটেই মস্ত প্রমাণ যে রবীন্দ্রনাথের তা সত্য নয়। কেবল রবীন্দ্রনাথই কেন ?—নবীনচন্দ্র, হেমচন্দ্র, বিহারীলাল থেকে আরম্ভ করে' সত্যেন দত্ত করণানিধান

পূর্ণাস্ত কারো কবি-আত্মাই যমুনা-পুলিনে কদম্ব-তরু ছায়ায় কলম নিয়ে বসে' গেল না। বসবে কি ? যমুনা যে আজ শুকিয়ে উঠেছে— আর কদম্বের শাখা প্রশাখা দিয়ে হয়ত মালগাড়ীর “ওয়াগন” তৈরী হচ্ছে। তুমি কি মনে কর যে বাঙালার কবিরা সব মোট বেঁধে জোর করে' বাঙালীর শ্রেষ্ঠ ও গভীরতর সত্যটাকে অস্বীকার করে' আসছেন ? আমি কিন্তু তা মনে করি নে।

মানুষের মধ্যে এক কবির জীবনেই কবি-আত্মার সঙ্গে তার বুদ্ধির সংগ্রাম সম্ভব নয়। তা যদি সম্ভব হয় তবে কবি অ-কবিই হয়ে উঠতে পারেন, সু-কবি হন না। যা হোক মধুসূদন “রাজাঙ্গনা কাব্য” লিখেছেন। কিন্তু শোনা “রাজাঙ্গনা”য় তিনি লিখেছেন—

নাচিছে কদম্ব-মূলে

বাজায়ে মুরলী রে-

রাধিকা-রমণ।

চল সখি! স্বরা করি

দেখি গে প্রাণের হরি

ব্রজের রতন।

চাতকী আমি স্বজনি!

শুনি জলধর-ধ্বনি

কেমনে ধৈরজ ধরি থাকি লো এখন ?

যাক মান, যাক কুল,

মন-তরী পাবে কুল,

চল, ভাসি প্রেম-নীরে ভেবে ও-চরণ!

কিন্ধা—

কে তুমি, শ্যামেরে ডাক, রাধা যথা ডাকে—

হাঁহাকার রবে ?



কে তুমি, কোন্ সুবতী, ডাকে এ বিরলে, সতি !  
 অনাথা রাখিকা যথা ডাকে গো মাধবে ?  
 অভয়-হৃদয়ে তুমি কহ আসি মোরে—  
 কে না জানে বাঁধা এ জগতে শ্যাম-প্রেম-ডোরে ?

কিষ্ণা—

কোথা রে রাখাল-চূড়ামণি ?  
 গোকুলের গাভীকুল দেখ, সখি, শোঁকাকুল,  
 না শুনে সে মুরলীর ধ্বনি ।  
 ধীরে ধীরে গোষ্ঠে সবে পশিছে নীরব,  
 আইল গো-ধূলি, কোথায় রছিল মাধব ?

কিস্ত আবার এর পরেই “বীরঙ্গনা-কাব্য” থেকে শোন—

এ কি কথা শুনি আজি মহরার মুখে  
 রঘুরাজ ? কিস্ত দাসী নীচ-কুলোস্তবা ;  
 সত্য-মিথ্যা-জ্ঞান তার কভু না সম্ভবে ।  
 কহ তুমি,—কেন আজি পুরবাসী যত  
 আনন্দ-সলিলে মগ্ন ? ছড়াইছে কেহ  
 ফুল-রাশি রাজপথে ; কেহ বা গাঁথিছে  
 মুকুল—কুসুম—ফল—পল্লবের মালা  
 সাজাইতে গৃহদ্বারে,—মহাৎসব যেন ?  
 কেন বা উড়িছে ধ্বজ শ্রীত গৃহচূড়ে ?  
 কেন পদাঙ্গিক, হয়, গজ, রথ, রথী  
 বাহিরিছে রণবেশে ? কেন বা বাজিছে

রণবাত ? কেন আজি পুরনারা-ব্রজ  
 মুল্লমুল্ল হুলাহুলি দিতেছে চৌদিকে ?  
 কেন বা নাচিছে নট ; গাইছে গায়কী ?  
 কেন এত বীণাধ্বনি ?

আর বেশি শোনাবার দরকার নেই। একদিকে “ব্রজাঙ্গনা” আর  
 একদিকে “বীরঙ্গনা”। এ দুয়ের স্বরে কোন প্রভেদ অনুভব করতে  
 পারো ? কোন প্রভেদ দেখতে পাও ? এ দুই স্বরে ঠিক সেই  
 প্রভেদ, যে প্রভেদ মিথ্যা কথায় ও সত্যের বাণীতে। আসলে মধুসূদন  
 যে ব্রজের গান গেয়েছেন সে গানে স্বরও জমে নি আর তালও  
 কেটেছে। তাহে আমাদের “মিশি নহবতের শ্রাণ-গলানো ঢালা স্বর”  
 ফোটে নি। “ব্রজাঙ্গনা-কাব্য” বাস্তবিক পক্ষে ব্রজাঙ্গনাবধ কাব্য  
 হয়ে উঠেছে।

আসলে আমাদের সাহিত্য সং হয়ে উঠবে সেইখানে, যেখানে  
 আমরা সত্য। অতীতের বীজ আমাদের ধমনীতে ধমনীতে রক্তের  
 সঙ্গে জড়িয়ে আছেই, আর আজ আমাদের বাহিরে যে আলোক  
 যে বাতাস রয়েছে, সেই আলোক সেই বাতাসে সেই বীজ যে আকারে  
 ফুটে বেরবে সেইটেই হবে আমাদের আসল সত্য। এই আজকার  
 আলোকের পাত যদি আমরা আমাদের চোখে পড়তে না দিই, আজকার  
 বাতাস যদি আমরা আমাদের নাসারন্ধ্রে প্রবেশ করতে না দিই তবে  
 আমাদের রক্তে সেই অতীতের বীজ পচে উঠে আমাদের শরীর  
 মনকেই দূষিত করবে, তাহে করে সত্যই বল আর সমাজই বল  
 দুয়েরই মরণের পথ ফলাও হ'তে থাকবে। ফলে আমাদের  
 জাতীয় জীবনের সনাতনত্ব অর্থাৎ বৃদ্ধাই পাকা হয়ে উঠবে, যৌবন

তাকে কোন দিনই আক্রমণ করতে পারবে না। এটা অনেকের পক্ষে আরামের অবস্থা হলেও সকলের পক্ষে মঙ্গলের কথা নয়।

মানুষ চলতে চলতে তার আপনার পরিচয় লাভ করে। মানুষের সাহিত্য হচ্ছে তার মনের চলার নিরিখ। ওই মনের চলা বন্ধ করবার ক্ষমতা কারোই নেই, কোন শাস্ত্রের পাতেও নেই, কোন অস্ত্রের হাতেও নেই। কেননা মানুষের চলাই হচ্ছে তার প্রথম সত্য। কারণ চলারই অর্থ হচ্ছে জীবনকে পাওয়া। আর এ সত্য মানুষের নিজের গড়া নয়—এ সত্য ভগবানের। এই অস্ত্রে হাজার শাস্ত্রও আজ আমাদের বেঁধে রাখতে পারছে না—লক্ষ্য অস্ত্রও পারবে না।

“অতীত” যতই উৎকৃষ্ট, যতই মহান, যতই যা-কিছু হোক না কেন তার একটা মস্ত অসুবিধা এই যে, তা “বর্তমান” নয়। আর “বর্তমানের” একটা মস্ত সুবিধা এই যে, তা “ভবিষ্যতকে” গড়ে তুলতে পারে। “বর্তমানের” এই সুবিধাকে আঁকড়ে ধরে’ যদি আজ আমরা কাজে না লাগাই তবে হয়ত আবার আর একদিন আসবে যখন আবার “পাত্রাধার তৈল কিম্বা তৈলাধার পাত্র” এ প্রসঙ্গের সীমাংসা করবার অস্ত্রে আমাদের তর্ক করতে বসে’ যেতে হবে। বর্তমান যে অতীতকে ফিরিয়ে আনতে পারে না, ভবিষ্যতই কে গড়ে’ তুলতে পারে এর অস্ত্রে দোষী কাল। কাল জিনিসটার পিছনে ফেলে-আসা জিনিসের মধ্যে কিছুমাত্র যায় নেই, তার সমস্ত অচুরাগ অনাগত যে তার অস্ত্রে। মানুষের অগতের এই সব নিয়মকে যত দিন না এক নতুন বিস্ময়িত্র এসে উল্টে দিতে পারছেন ততদিন আমাদের সাহিত্যেও এই সব নিয়মের ব্যতিক্রম কেউ করতে পারবে না। ব্যস্তির জীবনে যাই হোক না কেন সমষ্টি জীবনের দিক থেকে

এই কালের প্রভাবকে আমরা জানি বলেই ‘কাল-মাহাত্মা’ ‘যুগ-ধর্ম’ ইত্যাদি কথাগুলো আমরা মানি।

তুমি হয়ত এখানে বলে’ বসবে যে কালকেই কি বড় করে তুলতে হবে? মানুষের will বলে কি কোন পদার্থই নেই, পুরুষকার বলে’ কি কোন বস্তুই নেই? কালকে পরম করে’ দেখাও যা, দৈবকে চরম করে’ মানাও তাই। আর খেতে শুতে উঠতে বসতে যেতে দৈবকে মেনে মেনেই ত এ জাতটা গেছে। জীবনকুমার, তুমি ভারতবর্ষের ইতিহাস ভুল পাঠ করেছ। দৈবকে মেনে মেনে এ জাতটা যায় নি, এ জাতটা গিয়েছে পুরুষকারকে না মেনে মেনে। তুমি নিশ্চয় বলবে যে আমি হেঁয়ালি আঁড়াচ্ছি। কিন্তু তা নয়। আর ও-কথার তাৎপর্য হচ্ছে এই যে, দৈবও সত্য, পুরুষকারও সত্য। কেন না ভগবানও আছেন আর মানুষও আছে। কেবল দৈবকে মেনে মানুষ হয়ে ওঠে জড়, আর খালি পুরুষকারকে মেনে মানুষ হয়ে ওঠে দানব। তাই বড় মঙ্গল সেইখানে যেখানে মানুষ ভগবানের সঙ্গে মিলেছে, মঙ্গলে অয় ও অয়ে মঙ্গল সেইখানে, যেখানে মানুষের পুরুষ-কারের দ্বারা দৈবই সার্থক হয়ে উঠছে, যেখানে ভগবানের গুণ-বাণীকে মানুষ আপনার মনের ইচ্ছা করে তুলতে পেরেছে। ওইখানেই মানুষের পরাজয় নেই, তার অয়ে অমঙ্গল নেই। তুমি অিজ্ঞাস করতে পার যে =সবার পক্ষে ভগবানের বাণী পাওয়া কি সম্ভব? তা সম্ভব নয় বলেই আমাদের সব সময় পুরুষকারকে জাগিয়ে রাখতে হবে, যাতে করে আমাদের সে পুরুষকার আমাদের অজ্ঞাতসারেও ভগবানের দিকে আকৃষ্ট হতে একটা সুযোগ পায়।



কিন্তু কোথায় বৈষ্ণবপদাবলী আর কোথায় পুরুষকার। হয়ত আরও কিছুক্ষণ কলম চালালে তার মুখে ভাবাতন্ত্র, জীবতন্ত্র, নোহাং পক্ষে প্রবৃত্ততন্ত্র কি ঐ রকমের একটা কিছু এসে যাবে। কাজেই আজ এই ধান্নেই কসে' দাঁড়ি টানলুম। ইতি

তোমার সেকালের

মৃত্যুঞ্জয়।

## মুক্তির ইতিহাস।

—:—:—

সৃষ্টির কাজ প্রায় শেষ হয়ে যখন ছুটির ঘণ্টা বাজে বলে, হেনকালে ত্রদ্বার মাথায় একটা ভাবোদয় হল।

ভাণ্ডারীকে ডেকে বললেন, “ওহে ভাণ্ডারী, আমার কারখানা ঘরে কিছু কিছু পঞ্চভূতের জোগাড় করে আন, আর একটা নতুন প্রাণী সৃষ্টি করব।”

ভাণ্ডারী হাত জোড় করে বললে, “পিতামহ, আপনি যখন উৎসাহ করে' হাতি গড়লেন, তিমি গড়লেন, অজগর সর্প গড়লেন, সিংহ ব্যাঘ্র গড়লেন, তখন হিসাবের দিকে আদৌ খেয়াল করলেন না। যতগুলো ভাণ্ডারী আর কড়া জাতের ভূত ছিল সব প্রায় নিকাশ হয়ে এল। ক্ষতি অপূ তেজ তলায় এসে ঠেকেচে। থাকবার মধ্যে আছে মরুৎ-ব্যোম, তা' সে যত চাই।”

চতুমুখ কিছুক্ষণ ধরে চার জোড়া গোঁফে তা' দিয়ে বললেন, “আচ্ছা ভাল, ভাণ্ডারে যা আছে তাই নিয়ে এস, দেখা যাক!”

এবারে প্রাণীটিকে গড়বার বেলা ত্রদ্বার ক্ষতি অপূ তেজটাকে খুব হাতে রেখে খরচ করলেন। তাকে না দিলেন শিং, না দিলেন নখ, আর দাঁত যা দিলেন তা'তে চিবোনো চলে, কামড়ানো চলে না। তেজের ভাণ্ড থেকে কিছু খরচ করলেন বটে, তাতে প্রাণীটা যুদ্ধক্ষেত্রের কোনো কোনো কাজে লাগবার মত হল, কিন্তু তার লড়াইয়ের সখ

রইল না। এই প্রাণীটি হচ্ছে ঘোড়া। এ ডিম পাড়ে না তবু বাজারে তার ডিম নিয়ে একটা গুজব আছে, তাই একে বিজ বলা চলে।

আর যাইহোক, সৃষ্টিকর্তা এর গড়নের মধ্যে মরুৎ আর বোয়াম একেবারে ঠেসে দিলেন। ফল হল এই যে, এর মনটা প্রায় ঘোলা আনা গেল মুক্তির দিকে। এ হাওয়ার আগে ছুটতে চায়, অসীম আকাশকে পেরিয়ে যাবে বলে পথ করে বসে। অল্প সকল প্রাণী, কারণ উপস্থিত হলে, দৌড়য়; এ দৌড়য় বিনা কারণে; যেন তার নিজেই নিজের কাছ থেকে পালিয়ে যাবার একান্ত সখ। কিছু কাড়তে চায় না, কাউকে মারতে চায় না, কেবলি পালাতে চায়। পালাতে পালাতে একেবারে বৃন্দ হয়ে যাবে, বিম হয়ে যাবে, ভেঁই হয়ে যাবে, তার পরে না হয়ে যাবে, এই তার মৎলব। জ্ঞানীরা বলেন, ধাতের মধ্যে মরুৎবোয়াম যখন ক্ষিতি অপ্ ত্তেজকে সম্পূর্ণ ছাড়িয়ে ওঠে তখন এট রকমই ঘটে।

ত্রুনা বড় খুসি হলেন। বাসার জেছে তিনি অল্প অল্পের কাউকে দিলেন বন, কাউকে দিলেন গুহা, কিন্তু এর দৌড় দেখতে ভাল বাসেন বলে একে দিলেন খোলা মাঠ।

মাঠের ধারে থাকে মানুষ। কাড়াকুড়ি করে সে যা-কিছু জমায়ে সমস্তই মস্ত বোকা হয়ে ওঠে। তাই যখন মাঠের মধ্যে ঘোড়াটাকে ছুটতে দেখে, মনে মনে ভাবে এটাকে কোনগতিকে বাঁধতে পারলে আমাদের হাটকরার বড় স্বর্ধিধে।

কঁস লাগিয়ে ধরলে একদিন ঘোড়াটাকে। তার পিঠে দিলে জিন, মুখে দিলে কঁটা লাগাম। ঘাড়ে তার লাগায় চাবুক আর কঁখে মারে স্তুতার শেল। তা ছাড়া আছে দলামলা।

মাঠে ছেড়ে রাখলে হাতছাড়া হবে তাই ঘোড়াটার চারদিকে পাঁচিল তুলে দিলে। বাঘের ছিল বন, তার বনই রইল; সিংহের ছিল গুহা, তার গুহা কেউ কাড়ল না। কিন্তু ঘোড়ার ছিল খোলা-মাঠ, সে এসে ঠেকল আস্তাবলে। প্রাণীটাকে মরুৎবোয়াম মুক্তির দিকে অভ্যস্ত উৎসে দিলে কিন্তু বন্ধন থেকে বাঁচাতে পারলে না।

অত্যন্ত যখন অসহ্য হল তখন ঘোড়া তার দেয়ালটার পরে লাগি চালাতে লাগল। তার পা যতটা যখন হল দেয়াল ততটা হল না তবু চূণ বাগি খসে' দেয়ালের সৌন্দর্য্য নষ্ট হতে লাগল।

এতে মানুষের মনে বড় রাগ হল। বললে, “একেই বলে অকৃতজ্ঞতা। দানাপানি খাওয়াই, মোটা মাইনের সইস আনিয়ে আটপ্রহর ওর পিছনে খাড়া রাখি, তবু মন পাই নে!”

মন পাবার জেছে সইসগুলো এমনি উঠেপাড়ে ডাঙা চালালে যে ওর আর লাগি চলল না। মানুষ তার পাড়াপড়শিকে ডেকে বললে, “আমার এই বাহনটির মত এমন ভক্ত বাহন আর নেই।”

তারার তারিফ করে বললে, “তাইত একেবারে জলের মত ঠাণ্ডা। তোমারই ধর্ম্মের মত ঠাণ্ডা।”

একে ত গোড়া থেকেই ওর উপযুক্ত দাঁত নেই, নখ নেই, শিঙ নেই, তার পরে দেয়ালে এবং তদভাবে শুষে লাগি ছোঁড়াও বন্ধ। তাই মনটাকে খোলসা করবার জেছে আকাশে মাথা তুলে সেটি'হি টি'হি করতে লাগল। তাতে মানুষের যুগ ভেঙে যায় আর পাড়া-পড়শিরাও ভাবে আওয়াজটা ত ঠিক ভক্তি-গদগদ শোনাম্চে না।



মুখ বন্ধ করবার অনেক রকম যন্ত্র বেরল। কিন্তু দম বন্ধ না করলে মুখ ত একেবারে বন্ধ হয় না। তাই চাপা আওয়াজ মুমূর্ষুর খাবির মত মাঝে মাঝে বেরতে থাকে।

একদিন সেই আওয়াজ গেল ব্রহ্মার কানে। তিনি ধ্যান ভেঙে একবার পৃথিবীর খোলা মাঠের দিকে তাকালেন। সেখানে ঘোড়ার চিহ্ন নেই।

পিতামহ যমকে ডেকে বললেন, “নিশ্চয় তোমারি কীর্ত্তি! আমার ঘোড়াটিকে নিয়েচ।”

যম বললেন, “স্বষ্টিকর্তা, আমাকেই তোমার যত সন্দেহ! একবার মানুষের পাড়ার দিকে তাকিয়ে দেখ।”

ব্রহ্মা দেখেন, অতি ছোট জায়গা, চারদিকে পাঁচিল তোলা; তার মাঝখানে দাঁড়িয়ে ক্ষীণস্বরে ঘোড়াটি চিঁচিঁ চিঁচিঁ করচে।

হৃদয় তাঁর বিচলিত হল। মানুষকে বললেন, “আমার এই জীবকে যদি মুক্তি না দাও তবে বাঘের মত ওর নখ দস্ত বানিয়ে দেব, ও তোমার কোনো কাজে লাগবে না।”

মানুষ বললে, “ছিছি তাতে হিংস্রতার বড় প্রশ্রয় দেওয়া হবে। কিন্তু যাই বল, পিতামহ, তোমার এই প্রাণীটি মুক্তির যোগ্যই নয়। ওর হিতের জন্তেই অনেক খরচে আস্তাবল বানিয়েচি। খাসা আস্তাবল!”

ব্রহ্মা জেদ করে বললেন “ওকে ছেড়ে দিতেই হবে।”

মানুষ বললে, আচ্ছা ছেড়ে দেব। কিন্তু সাত দিনের মেয়াদে, তার পরে যদি বল তোমার মাঠের চেয়ে আমার আস্তাবল ওর পক্ষে ভাল নয় তাহলে নাকে খৎ দিতে রাজি আছি।”

মানুষ করলে কি, ঘোড়াটাকে মাঠে দিলে ছেড়ে; কিন্তু তার সামনের ছোটো পায়ে কসে রসি বাঁধল। তখন ঘোড়া এমনি চলতে লাগল যে ব্যাঙের চাল তার চেয়ে সুন্দর।

ব্রহ্মা থাকেন স্বদূর স্বর্গে; তিনি ঘোড়াটার চাল দেখতে পান, তার হাঁটুর বাধন দেখতে পান না। তিনি নিজের কীর্ত্তির এই ভাঁড়ের মত চালচলন দেখে লজ্জায় লাল হয়ে উঠলেন। বললেন, “ভুল করেচি ত!”

মানুষ হাত জোড় করে বললে, “এখন এটাকে নিয়ে করি কি? আপনার ব্রহ্মলোকে যদি মাঠ থাকে ত বরঞ্চ সেই খানে রওনা করে দিই।”

ব্রহ্মা ব্যাকুল হয়ে বললেন, “যাও, যাও, ফিরে নিয়ে যাও তোমার আস্তাবলে!”

মানুষ বললে, “আদিদেব, মানুষের পক্ষে এ যে এক বিষম বোঝা!”

ব্রহ্মা বললেন, “সেই ত মানুষের মনুষ্যত্ব!”

শ্রীরবীন্দ্রনাথ ঠাকুর।

## ৩রামেন্দ্রসুন্দর ত্রিবেদী ।

—:—

( ১ )

বৈদিক যজ্ঞ সম্বন্ধে সেনেট হলে পাঁচটি প্রবন্ধই বোধ হয় ত্রিবেদী মহাশয়ের শেষ রচনা। এর সর্বশেষ প্রবন্ধটি আচার্য্য রামেন্দ্রসুন্দর বেদ ও যজ্ঞের জন্মদাত্রী, তাঁর জন্মভূমির একটি বন্দনা দিয়ে শেষ করেন। এবং আমরা, তাঁর শ্রোতারা সমস্ত স্থানোচিত গান্ধীর্ষ্য বিস্মৃত হয়ে 'বন্দেমাতরম্' ধ্বনিতে সভা ভঙ্গ করি। শুনেছি এই ঘটনাটি আমাদের দেশের দু'একজন যথার্থ পণ্ডিত ব্যক্তিকে ক্ষুব্ধ করেছে। যে ভাব ও যে ভাষা সেনেট হলের ভিতরকে তার বাহিরের দিঘির পার বলে' বিভ্রম জন্মায়, তা বিশ্ব-বিচার আলয়ের উপযুক্ত কি না এ বিষয়ে তাঁদের মনে সন্দেহ উঠেছে। সে সন্দেহের নিরাসন কামনায় কোনও তর্ক তুলছি নে। কিন্তু বিশ্ব-বিচালয়ের উচ্চ আদর্শ খর্ব্ব করুক আর না-ই করুক এই ব্যাপারটি রামেন্দ্রসুন্দরের সাহিত্য সৃষ্টির একটি মন্দ্র কথার সঙ্গে আমাদের পরিচয় করিয়ে দেয়।

রামেন্দ্রসুন্দর ছিলেন পণ্ডিত। সে পাণ্ডিত্যের ব্যাপকতা ও গভীরতা কোনও দেশেই স্থলভ নয়। আধুনিক যুরোপের জ্ঞান বিজ্ঞান এবং প্রাচীন ভারতবর্ষের বেদ ও বেদাঙ্গ—এদুয়ের সঙ্গে কেবল তার ঘনিষ্ঠ পরিচয় নয়, মনের নাড়ীরও নিগূঢ় যোগ

ছিল। কিন্তু এ পাণ্ডিত্য তাঁর মনকে ভারাক্রান্ত করে নি। এ বিজ্ঞাকে তিনি অতি সহজ লঘুভাবেই বহন করতেন। কারণ এই জ্ঞান বিজ্ঞান, বেদ বেদাঙ্গ সবই ছিল তাঁর সতেজ ও সবল মনের খাদ্য-পানীয়, সঞ্চিত ধনের বোঝা নয়। এই জন্ম তার লেখার কোনও জায়গায় পাণ্ডিত্যের ছাপ ঠেলে ওঠে নি। তাঁর সজীব ও সরস মন পাণ্ডিত্যকে বাহন মাত্র করে' নিজেকেই প্রকাশ করেছে। তাই তাঁর সমস্ত রচনা তাঁর 'সুন্দর হাতে' উদ্ভাসিত, তাঁর চিরনবীন 'সুন্দর হৃদয়ের' 'মধুর্য্য-ধারায় অভিষিক্ত'। তাঁর বৈজ্ঞানিক-নিবন্ধ, দার্শনিক চিন্তা, ভাষাতত্ত্ব, সমাজ বিজ্ঞান সমস্তই পাণ্ডিত্যকে এড়িয়ে সাহিত্য হয়ে' বিকশিত হয়ে' উঠেছে।

কলেজের পাঠ্যাবস্থায় রামেন্দ্রসুন্দরের বিশেষ পাঠ্য ছিল জড়-বিজ্ঞান। এবং তাঁর প্রথমকার প্রবন্ধগুলি প্রায় সবই বৈজ্ঞানিক মন্ডর্ভ। আধুনিক বিজ্ঞানের সোনার কাঠির স্পর্শে প্রকৃতির কোন কোন মহলের দরজা খুলেছে, এবং কোন প্রাসাদে রাজ-কন্যারা জেগে উঠছেন, কোথায় বা দৈত্য-দানবের ঘুম ভাঙছে; সেই বিচিত্র কাহিনী যুবক রামেন্দ্রসুন্দর বাঙালী পাঠকদের উপহার দিয়েছেন। সত্য-নিষ্ঠার কঠোরতায়, বিশ্লেষণের নৈপুণ্যে, রচনার সরসতায় ও কল্পনার বৈচিত্র্যে আচার্য্য হান্সলির বৈজ্ঞানিক প্রবন্ধাবলী ছাড়া এ গুলিকে আর কিছুর সঙ্গে তুলনা করা চলে না। আধুনিক বিজ্ঞানের জ্ঞান-কাণ্ড এবং তার আচার্য্যেরা ত্রিবেদী রামেন্দ্রসুন্দরের মনের শ্রদ্ধা ও প্রীতি কতটা অধিকার করেছিল হেল্মহোল্টসের মৃত্যুর পর তাঁর জীবনী-প্রবন্ধে তিনি তার পরিচয় রেখে গেছেন। এই বিজ্ঞান চর্চা ও বিজ্ঞান প্রীতি রামেন্দ্রসুন্দরের সমস্ত চিন্তা ও রচনাকে অনগ্র



সাধারণ যুক্তির দৃঢ়তা ও স্বচ্ছতা দান করেছে। মতামতের সমর্থনে ও সমালোচনায় তাঁকে সমস্ত রকম অনুদরতা ও আতিশয্যের স্পর্শ থেকে মুক্ত রেখেছে।

আধুনিক প্রাণ-বিজ্ঞান রামেন্দ্রসুন্দরের অতি প্রিয় আলোচ্য বিষয় ছিল। ডারুইন থেকে আরম্ভ করে' বাইস্ম্যান, ডিট্রিস, ও নব-মেণ্ডেলীয় পণ্ডিতেরা প্রাণের যে নিগূঢ় তত্ত্ব প্রচার করেছেন রামেন্দ্রসুন্দরের ভাবুক মন তাতে গভীরভাবে সাড়া দিয়েছে। তাঁর সমাজ ও ধর্মতত্ত্বের আলোচনা এই নবীন জীববিদ্যার প্রভাবে পরিপূর্ণ। প্রাণের বিকাশ ও বিকারের তত্ত্বের আক্রোশে মানুষের সমাজ ও সভ্যতার উত্থান পতনের অঙ্ককার পথ কতটা আলোকিত হয় তিনি পরম কোতূহলের সঙ্গে নানা প্রসঙ্গে সেটা পরীক্ষা করে' দেখেছেন। এই আলোচনাগুলি রামেন্দ্রসুন্দরের বিজ্ঞান ও দার্শনিক চিন্তার মধ্যে সেতুর মতন। প্রাকৃতিক বিজ্ঞানের আলোকোজ্জ্বল-কুয়াশাহীন দ্বীপ থেকে যাত্রা আরম্ভ করে' তিনি এইখানে মানুষের অদৃষ্ট ভবিষ্যতের তমসাবৃত মহাদেশের দিকে পা বাড়িয়েছেন। এ আলোচনাগুলি বিজ্ঞানের মাটিতে শিকড় গেড়ে দর্শনের আকাশে পাতা মেলেছে, এবং সাহিত্যের অমৃতরস এদের অক্ষয় নবীনতা দান করেছে।

অদীর্ঘায়ু জীবনের শেষভাগে ত্রিবেদী রামেন্দ্রসুন্দর এই বিজ্ঞানের জ্ঞান, দার্শনিক-চিন্তা ও সাহিত্যের রস প্রতিভার রসায়নে একত্র মিশিয়ে বাঙলা-সাহিত্যকে এক অপূর্ব সম্পদ দান করে' গেছেন। রিপণ কলেজের অধ্যাপক সম্মিলনীতে অধ্যক্ষ রামেন্দ্রসুন্দর ধারাবাহিক কয়েকটি প্রবন্ধ পাঠ করেন। এর অনেকগুলিই 'ভারতবর্ষ'

পত্রিকায় পরে ছাপা হয়েছে। প্রবন্ধগুলির বিষয় ছিল আমাদের নিত্য ঘরকন্নার ব্যবহারিক জগৎ, বিজ্ঞানের কল্পিত প্রাতিভাসিক জগৎ, এবং আধ্যাত্ম জ্ঞানের পারমার্থিক জগতের মধ্যে সম্বন্ধ নির্ণয়। সাধারণ অবৈজ্ঞানিক লোকে শরীর যাত্রা নির্বাহের জন্তু জগতের যে মূর্ত্তি কল্পনা করে বা করতে বাধ্য হয়, বৈজ্ঞানিক তাকেই একটু কেটে ছেঁটে, অল্প-বিস্তর মেজে ঘসে' নিজের কাজ আরম্ভ করেন। কেননা সে কাজই হল এই ব্যবহারিক জগতের বস্তু ও ঘটনার, স্থিতি ও গতির ব্যাখ্যা দেওয়া। কিন্তু এই ব্যাখ্যার পথে চলতে চলতে আধুনিক বিজ্ঞান এমন সব তত্ত্বের পরিকল্পনা করতে বাধ্য হয়েছে ও হচ্ছে যে তাদের সমাবেশে জগতের যে মূর্ত্তিটি গড়ে' ওঠে সেটি মোটেই আমাদের পরিচিত ব্যবহারিক জগতের মূর্ত্তি নয়। যে মূলের টাঁকা আরম্ভ হল, টাঁকা শেষ হলে দেখা গেল সে মূলই নই। ফলে ব্যবহারিক জগতের সঙ্গে এই বৈজ্ঞানিক জগতের ঠিক সম্বন্ধটা কি, এবং এই দুই কল্পিত জগতের কোন অংশটা কি অর্থে সভ্য, এ সমস্যাটি দাঁড়িয়েছে যেমন কঠিন, তেমনি কোতূহল-কর। ব্যবহারিক জগতের সঙ্গে পরমার্থিক সভ্যতার সম্বন্ধ অবশ্য দর্শন-শাস্ত্রের প্রাচীন ও আদিম প্রশ্ন। কিন্তু বর্তমানে বৈজ্ঞানিকের কল্পিত জগতটি মাঝে পড়ে' প্রশ্নটিকে আরও ঘোরাল করে' তুলেছে। অভিজ্ঞ লোকে জানেন, এই সমস্যা বর্তমান পাশ্চাত্য দর্শনের বোধ হয় সর্ব-প্রধান আলোচ্য বিষয়। এবং পশ্চিমের বহু বৈজ্ঞানিক ও দার্শনিক মনীষা এর আলোচনায় নিযুক্ত আছে। কিন্তু আচার্য্য রামেন্দ্রসুন্দরের এই কয়টি বাঙলা প্রবন্ধের চেয়ে এ সমস্যার অধিক সূক্ষ্ম, অধিক গভীর ও অধিক সরস আলোচনা যুরোপেরও কোনও

দেশের ভাষা দেখাতে পারবে কিনা সন্দেহ করা চলে। কেননা অধুনিক জড় বিজ্ঞানের সঙ্গে যে নিকট পরিচয়, ভারতীয় ও পাশ্চাত্য দর্শনের চর্চায় যে মার্জিত বুদ্ধি ও ভাবপ্রকাশে সাহিত্যিকের যে শক্তি ও রস রামেন্দ্রসুন্দরে একত্র সমবেত হয়েছে বর্তমান যুরোপের সারস্বত-সমাজেও তা সুচূর্ণভ। আমাদের দুর্ভাগ্য রামেন্দ্রসুন্দর এই আলোচনাকে সম্পূর্ণ পরিণত গড়ন দিয়ে যেতে সময় পান নি। এবং বাঙলা ভাষা ও সাহিত্য বিশ্বের জ্ঞান বিজ্ঞানের ভাণ্ডারে একটা দেবার মত দানের গৌরব থেকে বঞ্চিত হয়েছে।

( ২ )

৩রামেন্দ্রসুন্দরের সব স্মৃতি সভাতেই বক্তৃতা তাঁর স্বদেশ-প্রীতির কথা তুলেছেন। আমাদের দেশের বর্তমান এখন আমাদের মনে কাঁটার মত বর্ধিত রয়েছে। অনুভবের শক্তি যার একেবারে লোপ হয় নি তার পক্ষেই বেশিক্ষণের জন্ম দেশকে ভুলে থাকা অসম্ভব। এই বেদনার নিত্য অনুভূতি আমাদের স্বদেশ-প্রীতির প্রথম লক্ষণ। এ ব্যাথা রামেন্দ্রসুন্দরের মনে কত মর্শাস্তিক ছিল, তাঁর লেখার সঙ্গে অল্পমাত্রও যার পরিচয় আছে তিনিই তা জানেন।

দেশের বাঁরা কর্মী তাঁদের স্বভাবতই চেফটা হবে উপযুক্ত-প্রতিষ্ঠান ও অনুষ্ঠানের মধ্য দিয়ে হীন বর্তমানকে মহৎ ভবিষ্যতের দিকে নিয়ে যাওয়া। রামেন্দ্রসুন্দর লোকে যাকে কাজের লোক বলে ঠিক তা ছিলেন না। যে রজোগুণের প্রাচুর্য মানুষকে ক্ষণমাত্রও অকর্শক থাকতে ও কাজ ছাড়া আর কিছুতেই আনন্দ পেতে দেয় না তাঁর প্রকৃতিতে সে রজোগুণের অভাব ছিল। ভাব ও চিন্তার

জগৎ ছাড়া কাজের জগতের চলাফেরা তাঁকে বিশেষ আনন্দ দিত না। কিন্তু রামেন্দ্রসুন্দরের স্বদেশ-প্রীতি এক জায়গায় তাঁর এই প্রকৃতিকে জয় করেছিল। বঙ্গীয় সাহিত্য-পরিষৎ-এর কাজে তিনি অক্লান্ত কর্মী ছিলেন। তিনি এর জন্ম অকাতরে নিজের সময় ও স্বাস্থ্য, দান করে' গেছেন। মনে হয় এ না হলে তিনি হয়ত জ্ঞান ও চিন্তার রাজ্যে আমাদের আরও অনেক বেশি দিয়ে যেতে পারতেন। কিন্তু স্বদেশের যে ভাষা ও সাহিত্যের বিগ্রহকে তিনি বিশেষ ভাবে পূজা করতেন, তার কাজের আহ্বান রামেন্দ্রসুন্দর কোনও মতেই উপেক্ষা করতে পারেন নাই।

প্রাচীন হিন্দু সভ্যতার উপর শ্রদ্ধা বোধ হয় আধুনিক হিন্দুর স্বদেশ-প্রীতির একটা অপরিহার্য অঙ্গ নয়। আমাদের দেশে এমন সব স্বদেশহিতৈষী আছেন যাদের অন্তরে এই সভ্যতার প্রতি বিন্দু-মাত্রও শ্রদ্ধা ও প্রীতি নেই। তাঁরা যে কথায় বা বক্তৃতায় এই সভ্যতায় গৌরব করেন না এমন নয়। কিন্তু যদি কোনও আলাদীন একরাতের মধ্যে ভারতবর্ষের সমস্ত অতীতটাকে মুছে ফেলে ভোরের আলোর সঙ্গে সঙ্গে আধুনিক যুরোপকে (প্রকৃতপক্ষে আধুনিক ইংলণ্ডকে কেননা ইংলণ্ডের বাইরের যুরোপীয় সভ্যতার সঙ্গে আমাদের তেমন পরিচয় নেই) একবারে গোটা দেশের উপরে বসিয়ে দিয়ে যায় তাতে তাঁরা হর্ষেও ফুল্লই হয়ে উঠবেন। এর অবস্থা এক কারণ—রুচিব প্রভেদ, মানুষের সকল বিষয়েই যখন রুচির তফাৎ রয়েছে, তখন কেবল সভ্যতার বেলাতেই দেশের সকলের রুচি এক হবে এমন আশা করা চলে না। কিন্তু এর নিঃসন্দেহ প্রধান কারণ আমাদের দেশের প্রাচীন সভ্যতার সঙ্গে আমাদের পরিচয়ের একান্ত অভাব। যে



একমাত্র সজীব ও সবল সভ্যতাকে আমরা জানি সে হ'ল আধুনিক যুরোপের হালের সভ্যতা। এবং সে সভ্যতা যখন বর্তমানে সাংসারিক হিসাবে অতি প্রবল তখন তাতে যে আমাদের মনকে মুগ্ধ এবং বাসনাকে প্রলুব্ধ করবে এতে আশ্চর্য্য হবার কিছুই নেই।

কিন্তু ত্রিবেদী রামেন্দ্রসুন্দরের দৃষ্টি কেবল হালের যুরোপেই একান্ত নিবদ্ধ ছিল না। এ সভ্যতার যা শ্রেষ্ঠ ফল তার আশ্বাদ তিনি বিশেষ ভাবেই পেয়েছিলেন। কিন্তু সেই সঙ্গে মানবজাতির প্রাচীন সভ্যতাগুলিরও তাঁর নিকট পরিচয় ছিল। সে পরিচয়ে তিনি জেনেছিলেন মানুষের সভ্যতার বিশালতা ও তার ইতিহাসের বৈচিত্র্য। সেইজন্ম চোখের সামনে আছে বলেই বর্তমান তাঁর কাছে অসঙ্গত রকম বড় হয়ে উঠতে পারে নি। প্রাচীন ও নবীন নানা সভ্যতার তুলনার কলে তিনি প্রাচীন হিন্দু-সভ্যতার প্রতি অশেষ প্রীতিমান ও গভীর শ্রদ্ধাবান হয়েছিলেন। অথচ সে প্রীতিতে কোনও মোহ ছিল না, সে শ্রদ্ধায় কোনও গৌড়ামি ছিল না। এ হিন্দু-সভ্যতা যে বিশাল মানব-সভ্যতার একটা অংশমাত্র সে কথা তিনি কখনও ভোলেন নি। সেইজন্ম ত্রিবেদী রামেন্দ্রসুন্দর নিতান্ত নিঃসঙ্কোচে বৈদিক মতের অনুষ্ঠান ও তার আদর্শের সঙ্গে সৃষ্টির ধর্মের অনুষ্ঠান ও আদর্শের তুলনা করে' এ দুয়ের মধ্যে গভীর মিল দেখিয়ে দিয়েছেন। কিন্তু এ বিশ্বাসও তাঁর খুব দৃঢ় ছিল যে অভিজ্ঞের বিচারে আমাদের প্রাচীন সভ্যতাকে কোনও সভ্যতার কাছেই মাথা হেঁট করে' দাঁড়াতে হবে না। কেন না তিনি সেই ভারতবর্ষকে জেনেছিলেন যে ভারতবর্ষ বেদ ও উপনিষদ্ সৃষ্টি করেছে, কপিল ও শাক্যমুনিকে জন্ম দিয়েছে, যার কবি মহাভারত রচনা করেছে, যার

ঋষি ধর্ম অর্থ কাম মোক্ষ কোনও বিছাকেই উপেক্ষা করে নাই; যে ভারতবর্ষের ক্ষত্রিয় দিগ্বিজয়ে গৌরব খুঁজেছে, যার রাজপুত্র রাজ্য ত্যাগ করে' প্রব্রজ্যা নিয়েছে। হিন্দুর এই প্রাচীন সভ্যতা রামেন্দ্র-সুন্দরকে মুগ্ধ করেছিল, এবং তিনি তাঁর স্বদেশবাসিকে এর সঙ্গে পরিচয় করিয়ে দিতে ব্যস্ত হয়েছিলেন। তার ফল তাঁর 'ঐতরেয় ব্রাহ্মণ'-এর বাঙলা অনুবাদ, তাঁর 'বিচিত্র প্রসঙ্গ,' তাঁর বৈদিক যজ্ঞের বিবরণ ও ব্যাখ্যা। তিনি বেঁচে থাকলে যে এই কাজেই তাঁর শক্তিকে বিশেষ করে' নিয়োজিত করতেন তাতে সন্দেহ নেই। কিন্তু যে ঋত বা নিয়মের তিনি উপাসক ছিলেন তাতে ব্যবস্থা অন্তরূপ। রামেন্দ্রসুন্দরের অকাল মৃত্যুতে দেশের এই ক্ষতিই বোধ হয় সব চেয়ে গুরুতর। ভাবহীন ও শ্রদ্ধাহীন পাণ্ডিত্যের হাতে ভারতবর্ষের প্রাচীন সভ্যতা কেমন মুক্তি ধারণ করে তা আমরা জানি; এবং রুদ্রচন্দ্র শ্রদ্ধার কাছে তার কি লাঞ্ছনা তাও আমাদের অজ্ঞাত নেই। কিন্তু ভাবুক ও শ্রদ্ধাশীল চক্ষুস্থান ও গণ্ডিতের মনে ভারতবর্ষের প্রাচীন সভ্যতার কি মুক্তি বি্রাজ করে রামেন্দ্রসুন্দর তার পরিচয় আমাদের দিতে আরম্ভ করেছিলেন। কিন্তু প্রস্তাবনাতেই তার যবনিকা পড়েছে, এবং অদূর ভবিষ্যতে তার অপসারণেরও কোনও সম্ভাবনা দেখা যায় না।

১২ই জুলাই, ১৯১৯

শ্রীঅতুলচন্দ্র গুপ্ত।